

Naqqiut

Siunnersuummut 15. marts 2017 ullulerneqartut taarserpai
(*Naqqiutit uani aaqqinneqarput §21, §69, §81 aamma §89*)

Uunga siunnersuut: Sullivimmi avatangiisit pillugit Inatsisartut inatsisaat nr. xx, xx. xxx 2017-imeersoq

Kapitali 1

Atorneqarnera

§ 1. Inatsisartut inatsisaanni pilersinniarnearput:

- 1) sullivinni avatangiisit isumannaatsut peqqinnartullu, sukkuulluunniit inuiaqatigiinni teknikkikkut inooqatigiinnikkullu ineriartornermut naapertuuttut, aamma
- 2) suliffeqarfiit suliffeqarnermi kattuffinnit ilitsersorneqarlutik aamma Sullivinnik Nakkutilliisoqarfimmit ilitsersorneqarlutik nakkutigineqarlutillu, namminneerlutik isumannaallisaanermut peqqinnissamullu apeqqutinik aaqqissinnaanissaannut tunngavissiiinissaq.

Imm. 2. Inatsisartut inatsisaanni timikkut tarnikkullu sullivimmi avatangiisit pineqartunut ilaapput.

§ 2. Inatsisartut inatsisaat sulisitsisumut tunngatillugu Kalaallit Nunaanni sulinermut tunngassuteqarpoq.

Imm. 2. Ilaatinneqanngitsut tassaapput:

- 1) sulisitsisup nammineerluni angerlarsimaffiani sulineq, taamaattoq takuuk § 55,
- 2) sulineq sulisitsisup ilaquataannut ilaasunit, inoqutigiinnut ilaasunit, suliarineqartoq, taamaattoq takuuk § 55,
- 3) sulineq sakkutuunit suliarineqartoq, aammalu sakkutuutut kiffartuussinerpiatut taaneqarsinnaasoq.

Imm. 3. Aalajangersakkat makkua sulinermi sulisitsisoq sullillugu suliarineqanngitsumi, kiisalu sulinermi imm. 2-mi taaneqartumi aamma pineqartunut ilaapput:

- 1) § 18 suliffiup sumiiffiani ataatsimi sulisitsisut arlallit il.il. pillugit, §§ 29-36 pilersuisuusut allallu pillugit aamma § 37 sanatitsisut il.il. pillugit,
- 2) §§ 38 aamma 39 sulinerup ingerlanneqarnera pillugu,
- 3) §§ 42 aamma 43 teknikkikkut atortorissaarutit pillugit,
- 4) §§ 44 aamma 45 akuutissat atortussallu pillugit,
- 5) § 54 aqquisinikkut assartuussineq pillugu,
- 6) § 56, imm. 3, navianartunik suliaqarnermi ukiut minnerpaaffissaat pillugu.

Imm. 4. Sakkutooqarfinnut aamma sakkutooqarfinni sanaartukkanut sullivinni avatangiisit pillugit maleruagassanik immikkut ittunik atuutsitsisoqassasoq Naalakkersuisut aalajangersinnaavaat.

§ 3. Inatsisartut inatsisaat nunami sulinermut tunngatillugu silaannakkut angallassinermut taamaallaat atuuppoq.

Imm. 2. Inatsisartut inatsisaat imarsiornermut aalisarnermullu taamaallaat atuuppoq, makkununnga tunngatillugu:

- 1) umiarsuarnik usilersuineq aamma usingiaaneq, ilanngullugit aalisariutit,
- 2) umiarsuarmi amutsivimmi suliaqarneq aamma suliaqarneq tamatumunnga sanilliunneqartariaqartoq.

§ 4. Inatsisartut inatsisaat suliaqarnermut sulisup angerlarsimaffiani ingerlanneqartumut killilimmik annertussusilimmik atuutissasoq, Naalakkersuisut aalajangersarsinnaavaat.

Kapitali 2

Suliffeqarfiit isumannaallisaanermut peqqinnissamullu tunngasutigut sulinerat Nammineerluni atassuteqarneq

§ 5. Suliffeqarfinni 1-9-nik sulisoqartuni suliffeqarfiup isumannaallisaanermik peqqinnissamullu suliaqarnera, sulisitsisup, sulianik aqutsisuujunnartut, takuuk § 23, sulisullu allat akornanni inuit attaveqatigiinnerisigut, ingerlanneqassaaq. Taamaattoq tamanna immikkut pisariaqartoq isumaqartoqarpat, isumannaallisaanermut aaqqissuussaanermik inerisaasoqassasoq pillugu Naalakkersuisut maleruagassiiinnaapput.

Isumannaallisaanermut aaqqissuussineq

§ 6. Suliffeqarfinni 10-nik amerlanernilluunniit sulisoqartuni, suliffeqarfiup isumannaallisaanermik peqqinnissamullu suliaqarnera aaqqissuussaassaaq.

Imm. 2. Immikkoortortaqarfimmi sulianut aqutsisoq imaluunniit suliassaqaqfik, isumannaallisaanermut sinniisoq peqatigalugu immikkoortortaqarfimmut imaluunniit suliassaqaqarfimmut pineqartumut isumannaallisaanermut suleqatigiinnik pilersitsissapput.

Imm. 3. Sulisut immikkoortortaqarfinnut imaluunniit sulianut aqutsisup suliassaqaqfiinut tamaginnut immikkut isumannaallisaanermut sinniisumik, isumannaallisaanermut suleqatigiinni ilaasussamik aammalu isumannaallisaaneq peqqinnissarlu pillugit apeqqutini sinniisussaminnik, toqqaassapput. Sulisut sinniisaat isumannaallisaanermut sinniisutut toqqaarneqarsinnaassaaq.

§ 7. Suliffeqarfinni 20-nik amerlanernilluunniit sulisoqartuni, taamaattoq takuuk § 8, imm. 7, isumannaallisaanermut ataatsimiititaliamik pilersitsisoqassaaq. Suliffeqarfimmi

isumannaallisaanermut suleqatigiinnik ataatsimik imaluunniit marlunnik pilersitsisoqarsimappat, isumannaallisaanermut suleqatigiit imaluunniit suleqatigiinni ilaasortat aamma suliffeqarfimmi pisortaq imaluunniit tassunga sinniisussaq akisussaassuseqartoq isumannaallisaanermut ataatsimiititaliami ilaasortaassapput. Isumannaallisaanermut suleqatigiinnik arlalinnik pilersitsisoqarsimappat, isumannaallisaanermut sinniisut akunnerminni ilaasortanik 2-nik aamma isumannaallisaanermut suleqatigiinni sulianut aqutsisut akkunnerminni ilaasortanik 2-nik toqqaassapput, tassani suliffeqarfimmi aqutsisoq imaluunniit taassuma sinniisussaq akisussaassuseqartoq ilaasortaallissalluni. Isumannaallisaanermut ataatsimiititaliaq suliffeqarfiup iluani isumannaallisaanermik peqqinnissamullu suliaqarnissamut pilersarusiussaaq, aqutsissalluni, siunnersuissalluni ilisimatitsisassallunilu kiisalu nakkutiginnissalluni.

Imm. 2. Sullivinnik Nakkutilliisoqarfimmit nakkutilliisoq suliffeqarfimmi takusaanermi, suliffeqarfiup aqutsisuinut aammalu pineqartup isumannaallisaanermut sinniisuinut, isumannaallisaanermut suleqatigiinni aamma isumannaallisaanermut ataatsimiititaliamut sinniisunut, akuttunngitsumik attaveqartassaaq. Taakkua Sullivinnik Nakkutilliisoqarfimmut isumannaallisaanermut peqqinnissamullu tungasunik apeqqutinik saqqummiussinissamut killilersorneqaratik periarfissaqassapput.

§ 8. Isumannaallisaanermut peqqinnissamullu suliffeqarfiup suliaqarnerata inerisarneqarnera atuuffissaalu pillugit maleruagassanik erseqqinnerusunik Naalakkersuisut aalajangersaassapput, ilanngullugit isumannaallisaanermut sinniisunik qinersisarneq pillugu, taakkua pisinnaatitaaffii pisussaaffiilu pillugit, isumannaallisaanermut suleqatigiinnik aamma isumannaallisaanermut ataatsimiititalianik pilersitsisarneq pillugu aammalu taakkua suliassai pillugit, kiisalu isumannaallisaanermik suliaqarnerup ulluinnarni aqunneqarnera pillugu.

Imm. 2. Sullivinni avatangiisinut ilinniartitaaneq pillugu maleruagassanik erseqqinnerusunik Naalakkersuisut aalajangersaassapput, ilanngullugit illuliortiternermut sanaartornermullu suliassaqrarfiit iluanni isumannaallisaanermut peqqinnissamullu suliaqarnermik ataqatigiissaarisunut sullivinnik avatangiisinut ilinniartitaaneq, atuartitsisut piukkunnassuseqarnissaat aamma ilinniartitaanermik neqerooruteqartunik pitsaassutsinut qulakkeerineq.

Imm. 3. Isumannaallisaanermut sulisut suliassai, suliffeqarfiup sulisullu akornanni isumaqatigiissuteqarneq malillugu avatangiisinut apeqqutit suliffeqarfimmut toqqaannartumik attuumassuteqartut ilaatilerlugit, annertusitinneqarsinnaapput. Maleruagassanik erseqqinnerusunik, suliffeqarfimmi sullivinni avatangiisinut apeqqutinik aaqqiissuteqarnissamik qulakkeerisunik, Naalakkersuisut aalajangersaasinnaapput.

Imm. 4. Suliffeqarfiup isumannaallisaanermik peqqinnissamullu suliaqarnerata nukittorsarneqarnissaa sunniuteqarluarnerulersinneqarnissaalu siunertaralugit § 6 aamma § 7, imm. 1, atugassarititaasut Naalakkersuisunit aalajangersarneqartut atuutsillugit saneqqunneqarsinnaapput, imaattoqarpat

- 1) ilaatigut sulisartut kattuffiata ataatsip arlallilluunniit aamma sulisitsisup kattuffiata imaluunniit kattuffiisa illuatungiusup imaluunniit sulisitsisut imaluunniit tamatumunnga taakkunanga piginnaatinneqartut akornanni isumaqatigiissuteqartoqarsimappat,
- 2) ilaatigut suliffeqarfinni nr. 1 malillugu isumaqatigiissuteqarnermi pineqartunut ilaasuni, sulisitsisup aamma suliffeqarfimmi sulisut imaluunniit suliffeqarfiup ilaani sulisut akornanni isumaqatigiissuteqartoqarsimappat.

Imm. 5. Imm. 4 malillugu isumaqatigiissutit qanoq isumaqatigiissutigineqassanersut pillugu maleruagassanik erseqqinnerusunik Naalakkersuisut aalajangersaasinnaapput.

Imm. 6. Imm. 4 malillugu isumaqatigiissutigineqartut nassuiarneqarnerat aamma unioqquatinneqarnerat pillugit apeqqutit, sulianut inatsisitigut imaluunniit tamanna ajornarsimappat, eqqartuussivinni suliarineqassapput.

Imm. 7. Naalakkersuisut suliaqarfinnut, suliaasaqarfinnut imaluunniit sullivinnut, § 6-imi, § 7, imm. 1-imi, aamma § 9, imm. 3-mi maleruagassat malillugit isumannaallisaanermik suliaqarnerup inerisarneqarnissaa pisariaqanngitsaq imaluunniit naapertuutinnngitsaq naliliisoqartillugu, maleruagassani taakkunani ilaatitsinnngitsaqarsinnaavoq imaluunniit pissutsit immikkut ittut taakkua malillugit qasukkartinneqarsinnaallutik.

Imm. 8. Naalakkersuisut aamma ilinniartitaaneq neqeroorutigineqanngippat, ataqatigiissaarisunut sullivinni avatangiisinut ilinniartitaaneq pillugu § 8, imm. 2-mi piumasagaatini ilaatitsinnngissinnaapput.

§ 9. Sulisitsisup isumannaallisaanermut ataatsimiititaliami nammineerluni ilaasortaannngikkuni, inummit akisussaasuusumit sinniisoqartitsinissamut, sulisitsisup pisussaaffeqarpoq.

Imm. 2. Isumannaallisaanermut suleqatigiinni aamma isumannaallisaanermut ataatsimiititaliami ilaasortat, isumannaallisaanermik suliaqarnermi pisussaaffimminnik isumaginninnissamut, pissutsit malillugit piffissamik naleqquttumik atugassaqaarnissaat, sulisitsisup isumagissavaa.

Imm. 3. Isumannaallisaanermut ataatsimiititaliami taamatullu isumannaallisaanermut suleqatigiinni ilaasortat isumannaallisaanermut apeqqutini pisariaqartunik ilisimasaqalernissaannut imaluunniit ilinniartitaanissaannut, sulisitsisup periarfissaqartissavai.

Imm. 4. Sulisitsisup isumannaallisaanermut suleqatigiit aamma isumannaallisaanermut ataatsimiititaliaq sullivimmi isumannaallisaaneq aamma peqqinnissaq pillugit apeqqutitut tunngatillugu pilersarusiornermi peqataanissaannut periarfissaqartissavai.

Imm. 5. Suliffeqarfinni § 6 naapertorlugu isumannaallisaanermut suleqatigiinnik ataatsinik arlalinnilluunniit pilersitsiviusimasuni, kisianni § 7 malillugu isumannaallisaanermut ataatsimiititaliamik pilersitsiviusussaannngitsuni, isumannaallisaanermut ataatsimiititaliap ataani suliaassat, isumannaallisaanermut suleqatigiit imaluunniit suleqatigiiaat suleqatigalugit sunniuteqarluartumik isumagineqaarnissaat, sulisitsisup isumagissavaa.

§ 10. Isumannaallisaanermut sinniisup sulineranut aningaasartuutit sulisitsisup akilissavai aammalu isumannaallisaanermut sinniisup isertitassat annaasai taarsissallugit, ilanngullugit isumannaallisaanermut pikkorissarnerni il.il. peqataanernut pisariaqartunut atatillugu aningaasartuutit aamma isertitassat annaaneqartut. Tamanna aamma sulianut aqutsisup isumannaallisaanermut pikkorissarnernut il.il. peqataaneranut pisariaqartumut, atuuppoq.

Imm. 2. Isumannaallisaanermut suliaqarnerup aaqqissuussaanerani ilaasortat ilinniartitaaneranni aningaasartuutinik tamakkiisumik ilaannakuusumilluunniit matussutissanik Namminersorlutik Oqartussat tapiissuteqassasut pillugu aalajangersakkanik erseqqinnerusunik Naalakkersuisut aalajangersaasinnaapput.

Imm. 3. Isumannaallisaanermut suliaqarnerup aaqqissuussaanerani ilaasortat, sulisut sinniisuinut aamma suliaqarfiup pineqartup imaluunniit assingusup iluani oqaaseqartartunut pisartut assigalugit, soraarsitaanissamut allatullu atukkaminik ajorseriartitsivigineqarnissamut, illersugaapput.

Imm. 4. Pissutsit imm. 1-imi aamma 3-mi taaneqartut pillugit isumaqatigiinnginnerit, ilanngullugit maleruagassat suut atorineqassanersut, aamma maleruagassat unioqqutinneqarneri imaluunniit nassuiarneqarneri, pillugit apeqqutit, sulianut inatsisitigut suliarineqassapput imaluunniit tamanna ajornarpat, eqqartuussivinni suliarineqassallutik.

§ 11. Sulisut isumannaatsuunissaat imaluunniit peqqissusaat eqqarsaatigineqartariaqartillugu, suliffeqarfiit isumannaallisaanermik suliaqarnermut sulianut ilisimasalinnik ikiorteqartitsissasut pillugu maleruagassanik Naalakkersuisut aalajangersaasinnaapput.

Kapitali 3

Maleruagassat nalinginnaasut

Sulisitsisoq

§ 12. Sulinermi atukkat isumannaallisaanikkut peqqinnissakkullu tamakkiisumik isumannaatsuunissaat sulisitsisup isumagissavaa. Pingaartumik makkua innersuussutigineqarput:

- 1) sulinerup ingerlanneqarnera pillugu kapitali 4,
- 2) suliffiup sumiiffia pillugu kapitali 5,
- 3) teknikkikkut atortorissaarutit pillugit kapitali 6 aamma
- 4) akuutissat atortussallu pillugit kapitali 7.

§ 13. Suliat suussusaat, sulinermi periaatsit aamma sulinermi suliat ingerlasarneri atorineqartut kiisalu suliffeqarfiup angissusaa aaqqissuussaanelu eqqarsaatigalugit, suliffimmi isumannaallisaanermut peqqinnissamullu tunngasunut allaganngorlugu sullivimmik nalilersuinerup suliarineqarnissaa sulisitsisup isumagissavaa. Sullivimmik

nalilersuineq suliffeqarfimmi pigineqassaaq aammalu suliffeqarfimmi aqutsisunit, sulisunit aamma Sullivinnik Nakkutilliisoqarfimmit pissarsiarineqarsinnaassalluni. Sulinermi, sulinermi periaatsinik aamma sulinermi sulianik ingerlatsitsisarnermi il.il. allannguuteqartoqartillugu aammalu allannguutit taakkua sulinerup nalaani isumannaallisaanermut peqqinnissamullu pingaaruteqarpata, sullivimmik nalilersuineq iluarsaanneqassaaq, taamaattoq kingusinnerpaamik ukiut pingasukkaarlugit tamanna pisassalluni.

Imm. 2. Sullivimmik nalilersuinermi, suliffeqarfimmi sullivimmi avatangiisini ajornartorsiutit aammalu taakkua qanoq iluarsineqassanersut isummerfigineqarnerat, ilaatinneqassaaq. Nalilersuineq makkuninnga ilaasunik imaqassaaq:

- 1) Suliffeqarfimmi sullivimmi avatangiisinut tunngasut suussusersineri aamma nalunaarsorneri.
- 2) Suliffeqarfimmi sullivimmi avatangiisini ajornartorsiutinik nassuiaaneq nalilersuinerlu.
- 3) Suliffeqarfimmi sullivimmi avatangiisini ajornartorsiutinik aaqqiinissamut iliuusissanut pilersaarummik pingaarnersiunermi salliutitsineq aamma suliaqarneq.
- 4) Iliuusissanut pilersaarutip malinnaaviginissaanut malittarisassat.

Imm. 3. Sulisitsisup isumannaallisaanermik suliaqartut imaluunniit sulisut sullivimmik nalilersuinerup pilersaarusernerani, aaqqissuunneqarnerani ingerlanneqarneranilu kiisalu malitseqartinneqarnerani akuutissavai, takukkit imm. 1 aamma 2.

Imm. 4. Imm. 1-3 malillugit sulisitsisup pisussaaffiitut maleruagassanik erseqqinnerusunik Naalakkersuisut aalajangersaassapput.

§ 14. Suliaqarnerup isumannaallisaanikkut peqqinnissakkullu tamakkiisumik isumannaatsumik ingerlanneqarnerata sunniuteqarluartumik nakkutigineqarnissaa, sulisitsisup isumagissavaa.

§ 15. Sulisitsisup sulisuni ajutoornissamut napparsimalernissamullu navianaatilinnik, suliaqarnerannut attuumassuteqarsinnaasunik, ilisimatissavai.

Imm. 2. Tamatuma saniatigut sulisitsisup sulisut pisariaqartunut ilinniartinneqarnissaat aammalu suliaqarnerup navianaateqanngitsumik ingerlannissaanik ilitserorneqarnissaat, isumagissavaa.

Imm. 3. Imm. 1 aamma 2 malillugit sulisitsisup pisussaaffii pillugit maleruagassanik erseqqinnerusunik Naalakkersuisut aalajangersaasinnaapput.

§ 16. Ilungersunartumik maannakkorpiarlu ingalassinnaangisamik navianartoqartillugu, sulisup sullivimmi imaluunniit sumiiffiup navianartumiittup qimannissaanut pisinnaatitaavoq.

Imm. 2. Imm. 1 malillugu sulisup sullivimmi imaluunniit sumiiffiup navianartumiittup qimannera pissutigalugu, sulisup atugai ajorseriartinneqassanngillat.

Imm. 3. Imm. 1 aamma 2 malillugit pisinnaatitaaffiit innarlerneqarsimappata, sulisoq taarsiivigineqartussaavoq.

§ 17. Kapitali 2 malillugu isumannaallisaaneq peqqinnissarlu pillugit suleqatigiinneq ingerlanneqassasoq sulisitsisup isumagissavaa, kiisalu suleqatigiinnermi peqataassalluni.

§ 18. Sulisitsisut arlallit, sullivimmi ataatsimi suliassanik suliaqartitsisut, aamma sullivimmi ataatsimi sulisut tamarmik, sulisunut tamanut isumannaatsumik peqqinnartumillu sulinnermi atugaqartitsilernissaq pillugu suleqatigiissapput.

Imm. 2. Suleqatigiinneq taanna pillugu maleruagassanik erseqqinnerusunik Naalakkersuisut aalajangersaasinnaapput.

§ 19. Suliassaqaqfiup pineqartup iluani Sullivinnik Nakkutilliisoqarfiup imaluunniit oqartussaasup imaluunniit sullissiviup § 70-imi taaneqartup allaganngorlugu peqqusissutigisimasaannut, isumannaallisaanermut sinniisut aamma sulisut sinniisaat ilisimatissallugit, sulisitsisoq pisussaaffeqarpoq. Pisussaaffik assingusoq isumannaallisaanermut sinniisunut aamma sulisut sinniisaannut, peqqusissummik paasitinneqarnissamik piumasaqaammik saqqummiussisunut, sulisitsisup pisussaaffigaa.

Imm. 2. Sullivimmi isumannaallisaanermut sinniisoqanngippat imaluunniit sulisut sinniisoqaratik, sulisut imm. 1, oqaaseqatigiit siulliit malillugit peqqussutigineqartunut paasitinneqassapput.

§ 20. Sullivinnik Nakkutilliisoqarfiup piumasarippagu, imaluunniit pissutsit allatigut tamatumunnga pissutissaqalersitsippata, sulinnermi atukkat isumannaallisaanikkut peqqinnissakkullu tamakkiisumik isumannaatsuunerat paasiniarlugu, sulisitsisoq misissuisitsissaaq, misissugassanik tigusititsissalluni imaluunniit takusaatitsissalluni, immikkut sulianut ilisimasallit sulitinneqarsinnaallutik.

§ 21. Sulisitsisoq Sullivinnik Nakkutilliisoqarfimmut nalunaarutiginnittassaaq aammalu maleruagassat Naalakkersuisunit aalajangersarneqartut malillugit nalunaarsuiffeqassalluni.

Imm. 2. Sullivinnik Nakkutilliisoqarfiup pisortaa kisitsisitigut naatsorsueqqissaarnermut atugassanik sulisitsisumit paasissutissanik piumasaqarsinnaavoq, makkua pillugit:

- 1) sulisut amerlassusaat, suaassusaat, ukiui aamma peqqinnissamut tunngasut,
- 2) maskiinat, maskiinat atortui, puut, sanaartugassat ikkussoriaannaat, atortorissaarutit, sakkut allallu teknikkikkut atortorissaarutit,
- 3) akuutissat atortussallu, aamma
- 4) pissutsit allat sullivimmi avatangiisinut pingaaruteqartut.

Imm. 3. Kisitsisitigut naatsorsueqqissaarneq tamanut saqqummiunneqarpat, ateq imaluunniit suliffeqarfik taaneqaqqusaanngilaq.

Suliffeqarfimmi aqutsisut allallu

§ 22. Sulisitsisup pisussaaffii pillugit Inatsisartut inatsisaanni aalajangersakkat, aamma suliffeqarfimmi pisortamut imaluunniit pisortaaqatigiinni ilaasunut atuupput.

Sulianik aqutsisoq

§ 23. Sulianik aqutsisoq paasineqassaaq tassaasoq sulisitsisoq sinnerlugu suliffeqarfimmi imaluunniit taassuma ilaani suliaqarnermik aqutsinissamik imaluunniit nakkutilliinissamik taamaallaat imaluunniit annertunerpaatigut suliaqartoq.

§ 24. Sulinermi atukkat isumannaallisaanikkut peqqinnissakkullu suliassaqrarfiup pineqartup iluani tamakkiisumik isumannaatsuunissaannut sulianik aqutsisoq peqataassaaq. Sulianik aqutsisup tamatumunnga ilanngullugu, isumannaallisaaneq peqqinnissarlu siuarsarniarlugit iliuusissat aalajangiunneqartut, siunertaasut malillugit ingerlanneqartut, nakkutigissavaa.

Imm. 2. Sulianik aqutsisoq kukkunernik amigaataasunilluunniit, ajutoornissamik imaluunniit napparsimalernissamik navianartorsiornermik malitseqarsinnaasunik, paasisaqaruni, pineqartup navianartorsiornermik pitsaaliuinissaaq isumagissavaa. Navianartorsiorneq sulianik aqutsisup sumiiffimmi akuliunneratigut pinngitsoortinneqarsinnaangippat, taassuma piaartumik pissutsit pillugit sulisitsisoq paasitissavaa.

§ 25. Sulianik aqutsisoq isumannaallisaaneq peqqinnissarlu pillugit suleqatigiinnermi peqataassaaq, takuuk kapitali 2, § 18 aamma § 37.

Sulisut

§ 26. Sulisut suliassaqrarfimmik iluanni sulinermi atukkamik isumannaallisaanikkut peqqinnissakkullu tamakkiisumik isumannaatsuunissaannut peqataassapput, iliuusissat isumannaallisaanerup peqqinnissallu siuarsarneqarnerat siunertaasut malillugit ingerlanneqarnissaanut aalajangiunneqartut ilanngullugit.

Imm. 2. Sulisut kukkunernik imaluunniit amigaataasunik, isumannaallisaanermik imaluunniit peqqinnissamik ajornerulersitsisinnaasunik, aammalu nammineerlutik iluarsisinnaangisaminnik, paasisaqarunik, tamanna isumannaallisaanermut suleqatigiinnut, sulianut aqutsisumut imaluunniit sulisitsisumut nalunaarutigissavaat.

Imm. 3. Suliassat, soorlu iluarsaassilluni imaluunniit ikkussuilluni suliarisinnaanarlugit isumannaallisaanermut tunngasut peerallartariaqarunigit, taanna suliaqarnerup ingerlanneqarnerata naammasseriitsiarnerani inisseqqinneqarsimanersooq, imaluunniit allatut taamatut isumannaassusilimmik illersuinissamat iliuuseqartoqarsimanersooq, misissussavaa.

§ 27. Isumannaallisaaneq peqqinnissarlu pillugit suleqatigiinnermut sulisut peqataassapput, takuuk kapitali 2.

§ 28. Sullivimmi sulisitsisut arlallit sulisitsivigisaanni sulisut, maleruagassat suliffeqarfiit suleqatigiinnerannut atuuttut malissavaat, takuuk §§ 18 aamma 37, tamatumalu saniatigut maleruagassat sulinermut ingerlanneqartumut atuuttut malissallugit.

Imm. 2. Suliffeqarfiup allap sumiiffiani sulisut, isumannaallisaaneq peqqinnissarlu pillugit maleruagassat, suliffeqarfimmu tassunga atuuttut, malissavaat, tamatumalu saniatigut maleruagassat sulinermut ingerlanneqartumut atuuttut malissallugit.

Pilersuisuusut, ikkussuisartut, iluarsaasartut pilersaarusiortartullu allallu

§ 29. Maskiinani, maskiinat atortuinik, puunik, sanaartugassanik ikkussoriaannarnik, atortorissaarutinik, sakkunik allanillu teknikkikkut atortorissaarutinik tunniussisup, atugassiisup imaluunniit takusassiarinnittup, atortut tunniunneqarneranni imaluunniit takusassiarineqarneranni illersuinermut atortunik pisariaqartunik atortulerneqarsimanissaat aammalu isumannaallisaanermut imaluunniit peqqinnissamut, takuuk kapitali 6, navianartorsiortitsiviunngitsumik siunertaminnut atorneqarsinnaanissaat, isumagissavaa. Atuinissaq, aserfallatsaaliuinissaq, assartuussinissaq aamma ikkussuinissaq pillugit ilitsersuutit pisariaqartut paasiuminartullu tunniussinermi ilaatinneqassapput.

Imm. 2. Teknikkikkut atortorissaarutit tuniniaqqinneqartussanngorlugit, attartortinneqartussanngorlugit imaluunniit atukkiunneqartussanngorlugit tunniunneqarpata imaluunniit atugassiisutigineqarpata, pisussaaffiit taakkua assingi atuutissapput.

Imm. 3. Sullivinnik Nakkutilliisoqarfiup piumasarippagu, imaluunniit allatigut pissutsit tamatumunnga pissutissaqartitsippata, nunamut eqqussisoq imaluunniit sanaartortoq, teknikkikkut atortorissaarutit isumannaallisaanikkut peqqinnissakkullu tamakkiisumik isumannaatsuunersut paasiniarlugu, misissuititsissaaq, misissugassanik tigusititsissaaq imaluunniit takusaatitsissaaq, immaqa immikkut sulianut ilisimasalinnik.

Imm. 4. Sullivinnik Nakkutilliisoqarfiup tamanna piumasarippagu nunamut eqqussisup imaluunniit sanaartortup teknikkikkut atortorissaarutit, isumannaallisaanermut imaluunniit peqqinnissamut navianarsinnaasut, tunineqartut annertussusaat pillugu paasissutissiissaaq.

§ 30. Maskiinami sorlermiluunniit Kalaallit Nunaanni tunniunneqartumi imaluunniit takusassiarineqartumi, sanaartortumut imaluunniit maskiinanut eqqunneqartunut tunngatillugu sanaartortup aqqa najugaalu allassimassaaq imaluunniit sanaartortoq nunamullu eqqussisoq ajornaatsumik kinaassusersineqarsinnaalersillugu allatut nalunaaqutserneqarsimassalluni.

§ 31. Suliffeqarfiup namminersortutut teknikkikkut atortorissaarummik ikkussuisup, allanngorsaasup imaluunniit pingaarnertigut iluarsaassisup, isumannaallisaanikkut peqqussutit innersuussutillu atortorissaarummumut atuuttut naammassineqarsimanersut, misissussavaa.

Imm. 2. Iluarsaassinermi atortuisa ilaat ataaseq imaluunniit ilai kisimik kalluarneqarpata, isumannaallisaanermut peqqussutit innersuussutillu atortuisa ilaannut tassunga atuuttut

naammassineqarsimanersut, iluarsaassisup misissussavaa. Iluarsaassisup sulinermi nalaani kukkunerit imaluunniit amigaatit isumannaallisaanermut pingaaruteqartut paasigunigit, tamatuminnga piginnittoq imaluunniit atuisoq paasitissavaa.

§ 32. Teknikkikkut atortorissaarummut, tunisassiorfimmuut imaluunniit illuliornermik sanaartormilluunniit suliaqartunut suliniummik tunniussisup, suliaqarnerup ingerlanneqarnerani aamma illuliap imaluunniit sanaartukkap il.il. naammassereersup ingerlanneqarnerani isumannaallisaaneq peqqinnissarlu suliniummi eqqarsaatigissavaa. Suliniummik taamaattumut nakkutilliisumut imaluunniit sullivinni avatangiisinut tunngasut pillugit siunnersortimut tamanna aamma atuuppoq.

§ 33. Kiffartuussinissamik neqeroortitsisup, neqeroortitsinermit najoqqutassiami suliarineranni, suliassap suliarineqarnerani isumannaallisaanerup peqqinnissallu eqqarsaatigineqarsimanissaa misissussavaa. Neqeroortitsisup aamma suliassamik suliarinnittup tamatumunnga paasitinneqarnissaa siunertaralugu, neqeroortitsinermit najoqqutassat sullivinni avatangiisinut tunngasut pingaaruteqartut immikkuullarissut, suliassap suliarineqarneranut tunngasut, pillugit neqeroortitsinermit najoqqutassat paasissutissanik attuumassuteqartunik imaqarnissaat, isumagissavaa.

Imm. 2. Suliassap neqeroortitsivigineqartup sulisitsisumit suliassamik suliakkerneqarsimasumit isumannaallisaanikkut peqqinnissakkullu tamakkiisumik isumannaatsumik suliarineqarsinnaanissaanut, neqeroortitsisoq aamma peqataassaaq.

§ 34. §§ 29-mi, 30-mi, 32-mi aamma 35, imm. 2-mi maleruagassat, aamma akuutissanik atortussanillu isumannaallisaanermut peqqinnissamullu navianaateqarsinnaasunik pilersuisuusunut allanullu aamma atuupput.

§ 35. Naalackersuisut pissutsit §§ 29-34-mi pineqartut pillugit maleruagassanik erseqqinnerusunik aalajangersaasinnaapput.

Imm. 2. §§ 29-34-mi maleruagassat atuisoq Inatsisartut inatsisaat malillugu pisussaaffeqarunnaarsinngilaat.

§ 36. Pissutsit immikkut ittut atuussimappata, Naalackersuisut §§ 29-34-imi piunasaqaatinik saneqqutsiviusussanik, maleruagassanik aalajangersaasinnaapput aalajangiisinnaallutilluunniit. Aalajangersakkat taamaattut aamma pisuni ataasiakkaani, pissutsit immikkut ittut atuussimappata, Sullivinnik Nakkutilliisoqarfimmit aalajangiiffigineqarsinnaapput.

Sanatitsisut il.il.

§ 37. Sulisitsisup illuliornermik sanaartornermillu isumannaallisaanikkut peqqinnissakkullu tamakkiisumik isumannaatsumik suliaqarsinnaanissaanut, sanatitsisoq peqataassaaq.

Imm. 2. Illuliornermik sanaartornermillu aalajangersimasumik annertussusilimmik suliaqarnermi, sulisitsisut arlallit sullivimmi ataatsimi sulisitsillutik, sulisut isumannaallisaavigineqarnerat peqqinnissaallu siuarsarniarlugu, sanatitsisoq iliuusissanik pilersaarusiussaaq, killissalersuissalluni ataqatigiissaarissallunilu.

Imm. 3. Imm. 2 malillugu sanatitsisup pisussaaffii pillugit maleruagassanik erseqqinnerusunik Naalakkersuisut aalajangersaassapput, ilanngullugit makkua pillugit:

- 1) sumiiffinni ataatsimoorussani, suliaqarnerup aallartinginnerani, sulisitsisut ataasiakkaat suliassaasa killissalersorneqarnerat,
- 2) sanaartorfissap pilersinneqannginnerani isumannaallisaanermut peqqinnissamullu pilersaarummik suliaqarneq,
- 3) sulinerup ingerlanneqarnerata nalaani sumiiffinni ataatsimoorussani isumannaallisaanerup peqqinnissallu siuarsarnissaannut iliuusissanik ataqatigiissarineq, aamma
- 4) ataqatigiissarisumik sullivimmi isumannaallisaanermut peqqinnissamullu apeqqutini immikkut ilinniartitaaneq pillugu pisariaqartunik ilisimasalimmik immikkullu ilinniagalimmik toqqaaneq.

Imm. 4. Sanatitsisup illuliornernermut sanaartornermullu suliaqarnissat annertunerusut Sullivinnik Nakkutilliisoqarfimmut nalunaarutiginiissaat pillugu maleruagassanik erseqqinnerusunik Naalakkersuisut aalajangersaassapput.

Kapitali 4

Sulinerup ingerlanneqarnera

§ 38. Sulineq isumannaallisaanikkut peqqinnissakkullu tamakkiisumik isumannaatsumngorlugu pilersaarusiorneqassaaq, aaqqissuunneqassaaq ingerlanneqassallunilu.

Imm. 2. Naalakkersuisut allamik aalajangiisimangippata, ileqqorisat malitassallu akuerisat isumannaallisaanermut imaluunniit peqqinnissamut pingaaruteqartut malinneqassapput.

§ 39. Piumasaqaatit sulinerup tamakkiisumik isumannaatsumik pilersaarusiorneqarsimasutut, aaqqissuunneqarsimasutut ingerlanneqarsimasutullu isigineqarsinnaanissaanut naammassineqarsimasussat pillugit maleruagassanik erseqqinnerusunik Naalakkersuisut aalajangersaasinnaapput, ilanngullugit:

- 1) immikkut navianartumik suliaqarnissanut, sulianik ingerlatitsinissamut aamma suliaqarnermi periaatsinut inerteqquteqarnerit,
- 2) inuit illersorneqarneranut atortussat aamma atisat sullisit immikkut ittut pillugit,
- 3) suliaqarnerit ajutoornissamut imaluunniit napparsimalernissamut annertuumik navianartumik malitseqarsinnaasut pillugit, ilanngullugit qaartiterinermik suliaqarnerit inunnit

ilinniagaqarsimanermut erseqqinnerusumik allassimasumut uppernarsaateqartunit imaluunniit misilitsissimasunit taamaallaat suliarineqaqqusaasut, kiisalu

4) isumannaallisaaneq imaluunniit peqqinnissaq eqqarsaatigineqartariaqartillugu, suleriaatsinut, sulinerup ingerlatinneqarneranut aamma suliaqarnermi periaatsinut pilersaarutinik suliaqartoqassasoq pillugu, aammalu pilersaarutit aamma taakkununga allannguutit, taakkua piviusunngortinneqarnissaat sioqqullugu, Sullivinnik Nakkutilliisoqarfimmut oqaaseqarfigineqartussanngorlugit imaluunniit akuersissuteqarfigineqartussanngorlugit saqqummiunneqartassasut.

Imm. 2. Maleruagassani, taakkua erseqqissumik allanneqarsimappata, ileqqorisanut malitassanullu innersuussisoqarsinnaavoq, ilanngullugu ulluliineq.

Kapitali 5

Suliffik

§ 40. Sullivik isumannaallisaanikkut peqqinnissakkullu tamakkiisumik isumannaatsunngorlugu aqqissuuneqassaaq.

Imm. 2. Naalackersuisut allamik aalajangiisimanngippata, ileqqorisanut malitassanullu akuerisaasut, isumannaallisaanermut peqqinnissamullu pingaaruteqartut, malinneqassapput.

§ 41. Sullivinnik aalajangersimasunik, sulliviugallartunik, nikerartunik aamma silamiittunik aqqissuussisarneq pillugu maleruagassanik Naalackersuisut aalajangersaasinnaapput, ilanngullugu aatsitassarsiorluni ingerlataqarnernut atatillugu iliuusissat immikkut ittut.

Imm. 2. Maleruagassani, taakkua erseqqissumik allanneqarsimappata, ileqqorisanut malitassanullu innersuussisoqarsinnaavoq, ilanngullugu ulluliineq.

Imm. 3. Tamatuma saniatigut Naalackersuisut maleruagassanik aalajangersaasinnaapput, pillugit,

1) suliffeqarfinnik sanaartornissamut imaluunniit allanngortiterinissamut suliaasaq assigisaaluunniit, taakkua piviusunngortinneqarnissaat sioqqullugu Sullivinnik Nakkutilliisoqarfimmut saqqummiunneqassasut,

2) ininik, teknikkikkut atortunik il.il. aqqissuussinissaq imaluunniit allanngortitsinissaq pillugu pilersaarutit, taakkua piviusunngortinneqarnissaat sioqqullugu Sullivinnik Nakkutilliisoqarfimmut oqaaseqarfigisassanngorlugit imaluunniit akuersissuteqarfigineqartussanngorlugit saqqummiunneqassasut, aamma

3) illuutit, init, nunaminertat il.il., init il.il. siunertamut eqqarsaatigineqartumut atorpeqarsinnaanersut pillugu apeqqut Sullivinnik Nakkutilliisoqarfimmut oqaaseqarfigineqartussanngorlugu imaluunniit akuersissuteqarfigineqartussanngorlugu saqqummiunneqareersimatinnagu, inuussutissarsiornermik suliaqartunut attartorteqqusaanngillat.

Kapitali 6

Teknikkikkut atortorissaarutit

§ 42. Teknikkikkut atortorissaarutit aaqqissuunneqarsimassapput, isumannaallisaanikkut peqqinnissakkullu tamakkiisumik isumannaatsunngorlugit. Atuinissaq pillugu maleruagassat aamma aserfallatsaaliuinnermut, eqqiaanermut, iluarsaassinermut assigisaannulluunniit atuupput.

Imm. 2. Naalackersuisut allamik aalajangiisimangippata, ileqqorisat malitassallu isumannaallisaanermut imaluunniit peqqinnissamut pingaaruteqartut malinneqassapput.

§ 43. Naalackersuisut teknikkikkut atortorissaarutit pillugit maleruagassanik aalajangersaasinnaapput, ataani allassimasut pillugit,

- 1) teknikkikkut atortorissaarutit immikkut navianaatillit sanaartorneqarnissaat, eqqunneqarnissaat, tunniunneqarnissaat, atugassiissutigineqarnissaat, takusassiarineqarnissaat imaluunniit atorneqarnissaat inerteqqutaassasoq,
- 2) teknikkikkut atortorissaarutinik ilusilersuinnermut, suliaqarnermut ikkussuinnermullu pilersaarutit Sullivinnik Nakkutilliisoqarfimmut oqaaseqarfigineqartussanngorlugit imaluunniit akuersissuteqarfigineqartussanngorlugit saqqummiunneqassasut,
- 3) teknikkikkut atortorissaarutit atuisumut tunniunneqarnissaat imaluunniit atugassiissutigineqarnissaat imaluunniit atorneqalernissaat sioqqullugu Sullivinnik Nakkutilliisoqarfimmit akuersissuteqarfigineqassasut,
- 4) teknikkikkut atortorissaarutit Sullivinnik Nakkutilliisoqarfimmut nalunaarutigineqassasut imaluunniit misilerartinneqassasut imaluunniit allatut nakkutiginnilluni misissorneqartassasut, ilanngullugu piffissakkaartumik, aamma
- 5) teknikkikkut atortorissaarutit ilisarnaaserlugit allagartalerneqarsimassasut, sanaartortoq eqqussisorlu kinaassusersiuminartunngorlugu, imaluunniit atortunut teknikkikkut paasissutissat, suussusaa suminngaaneerfialu, kiisalu akuersissuteqarnerit, misileraanerit imaluunniit pissutsit allat sullivinnut avatangiisinut pingaaruteqartut, paasiuminartunngorlugit.

Imm. 2. Maleruagassani, taakkua erseqqissumik allanneqarsimappata, ileqqussanut malitassanullu innersuussisoqarsinnaavoq, ilanngullugu ulluliineq.

Kapitali 7

Akuutissat atortussallu

§ 44. Akuutissat atortussallu isumannaallisaanermut imaluunniit peqqinnissamut navianarsinnaasut imaluunniit allatigut ajornerulersitsisinnaasut, sulianik ingerlatitsinerni periaatsinilu sulisut ajutuunnginnissaannut napparsimalernissaannullu sunniuteqarluartumik isumannaariviusunut, taamaallat sanaartorneqaqqusaapput atorneqaqqusaallutillu.

Imm. 2. Naalackersuisut allamik aalajangiisimangippata, ileqqorisat malitassallu isumannaallisaanermut imaluunniit peqqinnissamut pingaaruteqartut malinneqassapput.

§ 45. Naalackersuisut akuutissanik atortussanillu sanaartortarneq, eqquussisarneq, toqqorsivimmiititsisarneq, assartuussisarneq atuisarnerlu pillugit maleruagassanik aalajangersaasinnaapput, matumani ilanngullugit:

- 1) akuutissanik atortussanillu sulinermi atorneqartunik, imaluunniit taakkununga poortuusersuutunik, immikkut ilisarnaaserlugit nalunaaqutsersuisarneq,
- 2) sulinerup eqqiluitsuunissaanut silaannarmi mingutsitsinernik uuttortaasarnissamik pisussaaffeqarneq,
- 3) pissutsit akuutissat imaluunniit atortussat navianassusaannik nalilersuinermut pingaaruteqartut allallugit, akuutissanik atortussanillu nalunaaruteqartarneq aamma pillugit
- 4) isumannaallisaanermut atuagassiat, teknikkikkut paasisutissanut atuagassiat assigisaalluunniit pilersuisuneersut aamma sullivimmi atuinissamut innersuussutit sulisitsisuneersut.

Imm. 2. Naalackersuisut akuutissanik atortussanillu navianarsinnaasunik imaluunniit allatigut isumannaallisaanermik imaluunniit peqqinnissamik ajornerulersitsisinnaasunik sanaartornissamut, eqquussuinissamut atuinissamullu inerteqquteqarneq pillugu maleruagassiorsinnaapput.

Imm. 3. Akuutissat atortussallu pillugit maleruagassani, taakkua erseqqissumik allaneqarsimappata, ileqqorisanut malitassanullu innersuussisoqarsinnaavoq, ilanngullugu ulluliineq.

Imm. 4. Sullivinnik Nakkutilliisut akuutissanut atortussanullu killissanik, kiisalu akuutissanut atortussanullu navianartutut imaluunniit allatigut isumannaallisaanermut imaluunniit peqqinnissamut ajornerulersitsisutut isigineqartunut allattuiffimmik, aalajangersaasinnaapput.

Imm. 5. Akuutissat imaluunniit atortussat navianarsinnaasut imaluunniit allatigut isumannaallisaanermik imaluunniit peqqinnissamik ajornerulersitsisinnaasut, akuutissanik imaluunniit atortussanik naviananngitsunik, navianannginnerusunik imaluunniit akornutaannginnerusunik taarserneqarsinnaappata, atorneqassanngitsut, pillugu maleruagassanik Naalackersuisut aalajangersaasinnaapput.

Imm. 6. Akuutissat atortussallu navianarsinnaasut imaluunniit allatigut isumannaallisaanermik imaluunniit peqqinnissamik ajornerulersitsisinnaasut, Sullivinnik Nakkutilliisoqarfiup oqaaseqaataa imaluunniit akuersissutaa pigineqaleriinngippat, siunertanut aalajangersimasunut imaluunniit suliassaqarfiit immikkuullarissut iluanni atorneqassanngitsut, pillugu maleruagassanik Naalackersuisut aalajangersaasinnaapput.

Kapitali 8

Piffissaq qasuersaarfissaq aamma ulloq unnuarlu sulinngiffeqarneq

§ 46. Piffissaq suliffiusoq, sulisut piffissat nalunaaquttap akunnerinik 24-nik sivilissuseqartut tamarmik iluanni minnerpaamik nalunaaquttap akunnerini ataqatigiissuni 11-ni qasuersaarfegartussanngorlugit, aaqqissuunneqassaaq, taamaattoq takuuk § 51.

Imm. 2. Piffissaq qasuersaarfissaq nalunaaquttap akunnerinut 8-nut sivikillisinneqarsinnaavoq:

1) suliffeqarfinni eqimattakkaartumik ingerlatsiviusumik suliffiusuni eqimattat nikinneranni, eqimattat siulliit sulinerisa naammassinerata aammalu eqimattat aappaasa sulinerisa aallartinnerisa akornanni ulluinnarni imaluunniit sapaatit akunnikkaartumik qasuersaarfissaq naammassineqarsinnaasimangippat, aamma

2) nunalerinermik suliaqarnermi aamma aallaaniarnermi piniarnermilu qaammatisiutit malillugit ukiumi ataatsimi ullut 30-t angullugit, taamaattoq takuuk § 49.

Imm. 3. Usilersorneq aamma usingiarneq, aalajangersimasuunngitsumik sulisunit pingaartumik ingerlanneqartoq, kiisalu tamatumunnga atatillugu sulinerit pisariaqartut, imm. 1-imi aamma 2-mi pineqartunut ilaangillat. Qaangiuttoorluni sulinerup kingorna, sulisut pineqartut sulileqqinnissaat sioqqullugu, piffissaq qasuersaarfissap minnerpaaffissaa pillugu maleruagassanik erseqqinnerusunik Naalakkersuisut aalajangersaasinnaapput.

§ 47. Piffissap ullunik unnuanillu 7-inik sivilissuseqartup iluani sulisut sapaatip akunneranut ulloq unnuarlu ataaseq sulinngiffeqartassapput, ullut tamaasa piffissaq qasuersaarfissamat ilanngullugu inissinneqartussamik. Sapaatip akunneranut ulloq unnuarlu sulinngiffeqarneq sapinngisamik sapaammiitinneqassaaq aammalu sapinngisamik suliffeqarfimmi sulisut tamarmik ataatsikkoortassallutik.

Imm. 2. Imm. 1-imi, oqaaseqatigiit aappaani maleruagassaaq, nunalerinermut, naatsiivilerinermut, aallaaniarnermut piniarnermullu atuutinnigilaq.

Imm. 3. Inunnik, uumasunik naasunillu paarsilluni sulinermi kiisalu nalillit piujuartinnissaannut pisariaqartumik suliaqarnermi, illersuinissaq eqqarsaatigalugu imaluunniit ingerlaavartumik sullissinissaq imaluunniit taamaaqataanik tunisassiornissaq qulakkeerniarlugu pisariaqarpat, sapaatip akunneranut ulloq unnuarlu sulinngiffik kinguartinneqarsinnaavoq. Naalakkersuisut tamanna pillugu maleruagassanik erseqqinnerusunik aalajangersaasinnaapput.

§ 48. Pinngortitami pisunit, ajutoornernit, maskiinanit unittoornernit assigisaannilluunniit pisunik naatsorsuutigineqariinngitsunik suliffeqarfimmi nalinginnaasumik ingerlatsineq akornuserneqarpat, pisariaqartutut annertussusilimmik §§ 46 aamma 47 saneqqunneqarsinnaapput. Saneqqutsineq nakkutilliinermut allattuiiffimmi imaluunniit allami taamaaqataanik uppersaatissami, allanneqassaaq.

§ 49. Suliaqarfinnut aamma suliassaqarfinnut imaluunniit immikkut suleriaatsinut, pissutsit

tamanna pisariaqartippassuk, Naalackersuisut maleruagassanik aalajangersaasinnaapput makku pillugit:

- 1) ullut tamaasa piffissaq qasuersaarfissaq, ilanngullugu ullut tamaasa piffissaq qasuersaarfissap nalunaaquttap akunnerinut 8-nut sivikillineqartarnera aamma piffissaq qasuersaarfissap inissisimaffia pillugu, aamma
- 2) sapaatip akunneranut ulloq unnuarlu sulinnigiffeqarneq, ilanngullugu ulloq unnuarlu sulinnigiffeqarnerup allamut inissinneqarnera pillugu.

§ 50. Inuit qaffasinnerusumik atorfillit, kiisalu sinniisissat aamma tuniniaasartut suliffeqarfiup aalajangersimasumik sulliviata sumiiffiata avataani sulisartut, tamanna Naalackersuisunit erseqqinnerusumik aalajangersarneqarsimappat, taamaallaat §§ 46-mi aamma 47-mi pineqartunut ilaassapput.

§ 51. Atugassarititaasut suut atuutsillugit §§ 46 aamma 47 isumaqatigiissuteqarnikkut saneqqunneqarsinnaanersoq, pillugu maleruagassanik Naalackersuisut aalajangersaasinnaapput.

§ 52. §§ 46-51 malillugit saneqqutsisoqartillugu, taamaaqataanik taarsiussamik piffissamik qasuersaarfissaqartitsisoqassaaq imaluunniit ulloq unnuarlu sulinnigiffeqartitsisoqassalluni, imaluunniit taarsiussamik piffissamik qasuersaarfissaqartitsinissap imaluunniit ulloq unnuarlu sulinnigiffeqartitsinissaq ajornarluni qaqutigoortumik pisoqarpat, naleqquttumik illersuisoqassalluni. Oqaaseqatigiit siulliit inunnut qaffasinnerusumik atorfeqartunut atuutinngitsoq Naalackersuisut aalajangersaasinnaapput.

§ 53. Suliaqarnermut immikkut annertussusilimmik isumannaallisaanermik peqqinnissamullu navianartorsiortitsinnaasumut, piffissap suliffiusussap killeqartinneqarnissaa pillugu maleruagassanik Naalackersuisut aalajangersaasinnaapput.

§ 54. Maleruagassat §§ 49 aamma 53 malillugit aalajangersarneqartut, kikkunnut tamanut qamutinik mootorilinnik ingerlatsisunut imaluunniit inuttaasunut, atorneqarsinnaapput, ilanngullugu aamma suliaqarneq sulisitsisoq sullillugu ingerlanneqartuunngitsut.

Kapitali 9

Inuusuttut 18-it inorlugit ukiullit

§ 55. Kapitalimi matumani maleruagassat inuusuttunut 18-it inorlugit ukiulinnut, sulisitsisoq sullillugu suliaqartunut, atuupput, ilanngullugu aamma suliaqarneq § 2, imm. 2, nr. 1-imi aamma 2-mi taaneqartoq.

§ 56. Inuusuttunik 18-it inorlugit ukiulinnik sulisitsinermi, suliaqarnerup

pilersaarusiorneqarnerani, aaqqissuunneqarnerani ingerlanneqarneranilu inuusuttut ukiukinnerat, peqqissuusaat aamma timikkut eqqarsartaatsikkullu ineriartornerat kiisalu atuarnerannut imaluunniit allatut ilinniartitaanerannut sunniuteqarnerit eqqarsaatigineqassapput.

Imm. 2. Inuusuttut 15-it inorlugit ukiullit, imaluunniit atuartitaasussaataasunut, sulisinneqassanngillat, taamaattoq takukkit imm. 4-6.

Imm. 3. Inuusuttut suliffeqartinneqartarnerat pillugu maleruagassanik erseqqinnerusunik Naalakkersuisut aalajangersaasinnaapput, ilanngullugu sulinerup isumannaallisaanikkut peqqinnissakkullu tamakkiisumik isumannaatsumik ingerlanneqarsinnaanissaata qulakkeerneqarnissaa siunertaralugu, suliaqarnerni aalajangersimasumik ilusilinni sulisitsinermut 15-inik ukiulinnit ukioqqortunerutitsilluni ukionut killissaliinerit. Inuusuttunut ilinniarnermik ingerlatsisunut maleruagassat immikkut ittut aalajangersarneqarsinnaapput.

Imm. 4. Ilaannikkuinnaq imaluunniit sivikitsumik sulineq, sulisitsisup angerlarsimaffiani imaluunniit sulisitsisup ilaqutaanni ilaasunit taamaallaat ingerlanneqartoq, piumasaqaatit killilersuinerillu erseqqinnerusumik allanneqartut atuutsillugit, imm. 2-mi aamma §§ 57-imi aamma 58-imi inerteqquteqarnermi ilaatinneqassanngitsoq, Naalakkersuisut aalajangersaasinnaapput. Tunngavissaritinneqarpoq sulineq inuusuttut isumannaatsuunissaannut imaluunniit peqqinnissaannut navianaateqassanngitsoq.

Imm. 5. Inuusuttunut sulisitsisup ilaqutaanni inoqutaannilu ilaasunut tunngatillugu, piumasaqaatit killilersuinerillu erseqqinnerusumik allassimasut atuutsillugit ukionut killissaliussani imm. 3 naapertorlugu aalajangersarneqartuni saneqqutsinissat Naalakkersuisut aalajangersarsinnaavaat.

Imm. 6. Naalakkersuisut aamma maleruagassanik aalajangersaasinnaapput makku pillugit, 1) inuusuttut 13-inik ukioqalereersimasut, sulinerit erseqqinnerusumik killissalersorneqarlutik ilusilerneqartut iluanni aammalu piumasaqaatit atugassarititaasullu erseqqinnerusumik aalajangersarneqartut atuutsillugit, oqinnerusunik sulisinneqarsinnaasut, 2) imm. 2-mi aamma § 57-imi inerteqquteqarneq, inuusuttunut 14-inik ukioqalereersimasunut, aammalu ilinniarnermut ilaatillugu sulisunut imaluunniit inatsisini pisussaaffiusumik atuartinneqarnissamut taarsiullugu ingerlanneqartumut, saneqqunneqarsinnaasq, 3) imm. 2-mi aamma §§ 57-imi aamma 58-imi inerteqquteqarneq, inuusuttut isiginnaartitsinerni il.il. kulturimut imaluunniit eqqumiitsuliornermut tunngasuni, timersornermik aaqqissuussinerni imaluunniit filmiliornermi assigisaaniluunniit inuttaanerannut tunngatillugu, piumasaqaatit atugassarititaasullu erseqqinnerusumik aalajangersarneqartut atuutsillugit saneqqunneqarsinnaasq, taamaattoq inuusuttunut 13-init inorlugit ukiulinnut tunngatillugu, pisuni ataasiakkaani tamaginni akuersissummik piniartoqartassalluni, aamma 4) imm. 2-mi aamma §§ 57-imi aamma 58-imi inerteqquteqarneq, inuusuttut aallaaniarnermi piniarnermilu peqataanerannut tunngatillugu, piumasaqaatit atugassarititaasullu aalajangersarneqartut atuutsillugit saneqqunneqarsinnaasut.

Imm. 7. Sulisitsisoq inuusuttunik 15-it inorlugit ukiulinnik imaluunniit atuartitaasussaataitaasunut sulisitsinermini, inuusuttup angajoqqaavi imaluunniit nakkutiginnittua sulisitsinerminik paasitissavaa, ilanngullugit piffissap suliffiusup sivilusussaa kiisalu ajutoornissamut napparsimalernissamullu navianartut, sulinermut atasuusinnaasut, aammalu isumannaallisaaneq peqqinnissarlu pillugit iliuusissat aalajangiunneqartut.

§ 57. Inuusuttunut 18-it inorlugit ukiulinnut piffissaq suliffiusoq, inersimasunut suliaraqfimmi tassani sulitinneqartunut piffissamit suliffiusumit nalinginnaasumit sivilusunerussanngilaq, aammalu ullormut nalunaaquttap akunnerinit 8-nit aamma sapaatip akunneranut nalunaaquttap akunnerinit 40-nit aamma sivilusunerussanani.

Imm. 2. Inuusuttunut 15-it inorlugit ukiulinnik imaluunniit atuartitaasussaataitaasunut tunngatillugu ullormut piffissaq suliffiususaaq, ulluni atuarfiusussani nalunaaquttap akunnerinit 2-nit aammalu ulluni allani ullunit atuarfiusussanit allaanerusuni nalunaaquttap akunnerinit 7-init, sivilusuneroqqusaanngilaq. Taamaattoq inuusuttut 15-inik ukioqalereersimasut, kisianni suli atuartitaasussaataitaasut, ulluni allani ullunit atuarfiusussanit allaanerusuni nalunaaquttap akunnerini 8-ni sulisinnaapput. Sapaatip akunneranut piffissaq suliffiususaaq tamarmiisoq sapaatip akunnerini ullunik atuarfiusussanik ilaqartuni nalunaaquttap akunnerinit 12-init aamma ulluni allani ullunit atuarfiusussanit allaanerusuni nalunaaquttap akunnerinit 35-nit sivilusuneroqqusaanngilaq. Taamaattoq inuusuttut 15-inik ukioqalereersimasut, kisianni suli atuartitaasussaataitaasut, sapaatit akunnerini allani sapaatit akunnerini atuarfiusussanit allaanerusuni nalunaaquttap akunnerini 40-ni sulisinnaapput. Inuusuttunut 15-inik ukioqalereersimasunut, kisianni atuartitaasussaataitaajunnaarsimasut, piffissap suliffiusoq ullormut nalunaaquttap akunnerinit 7-init aamma sapaatip akunneranut nalunaaquttap akunnerinit 35-nit sivilusuneroqqusaanngilaq.

Imm. 3. Ullormut piffissaq suliffiususaaq nalunaaquttap akunnerinit 4½-init sivilusuneruppat, inuusuttoq 18-it inorlugit ukiulik minnerpaamik minutsini 30-ni unikkallartinneqassaaq. Unikkallarnek naleqquttumik aammalu ajornanngippat ataqatigiissumik inissinneqassaaq.

Imm. 4. Inuusuttut 18-it inorlugit ukiullit piffissami nal. 20.00 aamma nal. 06.00 akornanni suleqqusaanngillat.

Imm. 5. Naalackersuisut maleruagassanik immikkut ittunik aalajangersaasinnaapput makku pillugit:

- 1) piffissap suliffiusup aqqissuunneqarnera aamma inuusuttoq sulisoq ilinniarnerninut ilaatillugu imaluunniit sulisitsisut arlallit sullillugit sulitillugu, naatsorsuineq,
- 2) inuusuttunut 15-inik ukioqalereersimasunut aammalu atuartitaasussaataitaajunnaarsimasunut, imm. 1 qanoq annertutigisumik saneqqunneqarsinnaanersoq,
- 3) inuusuttut atuartitaasussaataitaasut, atuanngiffeqarnerup ingerlanerani piffissami sulinngiffeqarluinnassasut, aamma

4) imm. 4-mi aalajangersagaq suliaqarfinnut imaluunniit suliassaqarfinnut, pissutsit tamanna pisariaqalersippassuk imaluunniit inuusuttunut 15-inik ukioqalereersimasunut aammalu atuartitaasussaataajunnaarsimasunut tamanna kissaatiginarpat, saneqqunneqarsinnaavoq, taamaattoq inuusuttoq qanoq pisoqaraluarpalluunniit nal. 24.00 aamma nal. 04.00 akornanni piffissami suleqqusaassanani.

§ 58. Inuusuttut 18-it inorlugit ukiullit ulloq unnuarlu minnerpaamik nalunaaquttap akunnerini 12-ini ataqatigiissunik qasuersaarfeqartinneqassapput. Taamaattoq inuusuttoq 15-it inorlugit ukiulik, imaluunniit atuartitaasussaataasoq, ulloq unnuarlu minnerpaamik nalunaaquttap akunnerini 14-ini ataqatigiissunik qasuersaarfeqartinneqassaaq.

Imm. 2. Piffissap ullunik unnuanillu 7-inik sivisussuseqartup iluani inuusuttoq 18-it inorlugit ukiulik ullut unnuallu marluk ataqatigiissunik sulinngiffeqartinneqassaaq. Ullut unnuallu marluk ataqatigiissillugit sulinngiffeqarnissaaq ajornarsimappat, ulloq unnuarlu sulinngiffeqarnerup aappaa ullormut qasuersaarfeqarnissamut ilanngullugu inissinneqassaaq. Ulloq unnuarlu sulinngiffiusussap aappaa sapinngisamik sapaammiitinneqassaaq.

Imm. 3. Suliaqarfinnut aamma suliassaqarfinnut imaluunniit sulinerit ilusaannut immikkut ittunut tunngatillugu, pissutsit tamanna pisariaqalersippassuk imaluunniit kissaatiginarpat, Naalakkersuisut maleruagassanik aalajangersaasinnaapput makku pillugit:

- 1) inuusuttunut 15-inik ukioqalereersimasunut aammalu atuartitaasussaataajunnaarsimasunut tunngatillugu, inuusuttoq taarsiussamik qasuersaarfeqartinneqartussanngorpat, piffissap qasuersaarfiussap sivisussusaa,
- 2) inuusuttut 15-inik ukioqalereersimasut aammalu atuartinneqartussaataanermit pineqartunut ilaajunnaarsimasut, inuusuttoq taarsiussamik qasuersaarfeqartinneqartussanngorpat, ulloq unnuarlu sulinngiffiusussap kinguartinneqartarnera,
- 3) piffissap qasuersaarfiussup kipitinneqartarnera aamma
- 4) ulloq unnuarlu sulinngiffeqarnermut killilersuineq, taamaattoq inuusuttoq piffissap ullunik unnuanillu 7-inik sivisussuseqartup iluani ataqatigiissumik minnerpaamik nalunaaquttap akunnerini 36-ni tamatigut sulinngiffeqartinneqartassalluni.

§ 59. § 57, imm. 1, 3 aamma 4, inuusuttunut 15-inik ukioqalereersimasunut aammalu atuartitaasussaataajunnaarsimasunut tunngatillugu pisuni § 48-mi taaneqartuni saneqqunneqarsinnaasoq, Naalakkersuisut aamma allatigut maleruagassanik aalajangersaasinnaapput.

Kapitali 10

Nakorsamit misissortinnerit il.il.

§ 60. Suliffeqarfinnut, suliaqarfinnut, suliaasaqarfinnut imaluunniit sulisunut eqimattanut tunngatillugu, sulineranni sulisut peqqissusaat navianartorsiorfiusimappat, Naalackersuisut maleruagassanik aalajangersaasinnaapput makku pillugit,

- 1) sulisut atorfinitsinneqarnissaat sioqqullugu, atorfinitsinneqarnerisa nalaani aamma atorfeqarunnaareernerisa kingorna, akuttunngitsumik misissortinnikkut pisinnaasumik, nakorsamut misissortittassasut, aamma
- 2) akuttunngitsumik imaluunniit pisuni ataasiakkaani peqqinnissamut tunngasunik sullivimmi nakorsartinnikkut, sullivimmi eqqiluusaarnikkut imaluunniit allatigut misissortinnerit ingerlanneqartassasut.

Imm. 2. Sulineq peqqinnissamut navianaateqarsinnaasoq nalilersorniarlugu taamaaqataanik misissortittarnissat pillugit maleruagassanik Naalackersuisut aalajangersaasinnaapput.

Imm. 3. Misissortinnernut aningaasartuutit, maleruagassat Naalackersuisunit aalajangersarneqartut malillugit, sulisitsisumit imaluunniit Namminersorlutik Oqartussanit akilerneqassapput.

Imm. 4. Misissortinnerit sulisut isertitassaminnik annaasaqartinnagit aammalu sapinngisamik piffissap suliffiusup iluani ingerlanneqarsinnaanissaat, sulisitsisup isumagissavaa.

Imm. 5. Sulisut aammalu siusinnerusukkut sulisuusimasut misissortittarnissamut pisussaaffeqartut pillugu maleruagassanik Naalackersuisut aalajangersaasinnaapput.

§ 61. Inuusuttut 18-it inorlugit ukiullit sulisitsisumi sulilernissaat siunertarlugu nakorsamut misissortittarnissaat pillugu maleruagassanik immikkut ittunik Naalackersuisut aalajangersaasinnaapput. § 60, imm. 3-5, taamaaqataanik atuutissaaq.

Imm. 2. Atuarfimmi nakorsaq atuartup atuarfimmt qimagunnissaa sioqqullugu misissuineq tunngavigalugu, atuartup inuussutissarsiorluni sulinerup nalaani isumannaatsuunissaanut peqqissusaanullu sunniuteqarsinnaasumik, atuartoq nappaateqarnerisooq imaluunniit nappaateqarsimanersooq pillugu nalunaaruteqassasooq, maleruagassani aalajangersarneqarsinnaavoq. Maleruagassat taamaaqatai inuusuttunut 18-it inorlugit ukiulinnut, suliaqarfinnut ilinniartuusunut tunngatillugu, aalajangersarneqarsinnaapput.

Imm. 3. Sulisitsisut inuusuttumik 18-it inorlugit ukiulimmik atorfinitsitsinermi, suliaqarnej inuusuttup sulisussarsiarineqarfia, inuusuttup peqqissusaanut naapertuuttoq qulakkeertassagaat, maleruagassani aamma aalajangersarneqarsinnaavoq.

Kapitali 11

Imartani atortuni sullivimmi avatangiisit pillugit immikkut

§ 62. Kapitalimi matumani pisinnaatitsissummik pigisaqartoq paasineqassaaq tassaasoq, aatsitassat pillugit ingerlatallu tamatumunnga pingaarutillit pillugit Inatsisartut inatsisaat malillugu pisinnaatitsissummik pigisaqartoq.

§ 63. Imartani ikummatissanik misissuineranut, qalluineranut assartuineranulluunniit atortunut atatillugu piginnaatitsissummik pigisaqartup isumannaallisaanikkut peqqissutsikkullu aarlerinaatit sapinngisamik, aatsitassat pillugit ingerlatallu tamatumunnga pingaarutillit pillugit Inatsisartut inatsisaat malillugu akuersissut naapertorlugu, tigussaasumik naammaginatumillu suussusersissavai, nalilersussavai kiisalu annikillisassallugit.

Imm. 2. Piginnaatitsissummik pigisaqartup isumagissavaa imartani atortut ingerlanneqarnerat inatsisartut inatsisaat manna, aatsitassat pillugit ingerlatallu tamatumunnga pingaarutillit pillugit Inatsisartut inatsisaat malillugu, aalajangersakkallu aatsitassat pillugit ingerlatallu tamatumunnga pingaarutillit pillugit Inatsisartut inatsisaat malillugu naapertuuttumik ingerlanneqartoq nakkutigissallugu.

Imm. 3. Piginnaatitsissummik pigisaqartup suliffeqarfiup piginnaatitsissummik pigisaqartoq sinnerlugu akuersissut malillugu ingerlatanik suliarinnittoq imaluunniit nakkutiginnittoq aqutsillunilu periarfissaqarneraq isumannaallisaanikkut, peqqissutsikkut avatangiisitigullu pisussaaffiit eqquutsissinnaanera isumagissavai. Piginnaatitsissummik pigisaqartup aamma suliffeqarfiup pineqartup isumannaallisaanikkut peqqissutsikkullu aarlerinaatit tigussaasumik suussusersissavai, nalilersussavai kiisalu annikillisarlugit isumagissavai, ingerlatallu inatsisartut inatsisaannut matumunnga inatsisinut aalajangersakkanullu allanut Inatsisartut inatsisaat naapertorlugu aalajangersarneqartunut aamma inatsisinut allanut naapertuuttumik ingerlanneqarnerat isumagalugulu nakkutigissavai..

Imm. 4. Imartani atortut Kalaallit Nunaata imartaata iluaniittut imaluunniit immap naqqani nunavissuit killeqarfiisa iluaniittut pillugit isumannaallisaaneq peqqissuserlu pillugit Naalakkersuisut erseqqinnerusumik malittarisassiuussinnaapput.

Kapitali 12

Sullivinni avatangiisinut siunnersuisooqatigiit il.il.

§ 64. Sullivinni avatangiisinut siunnersuisooqatigiit, suliffeqarnermi illuatungeriit isumannaatsumik peqqinnartumillu sullivinni avatangiiseqarnissamut suliniuteqarnermi sunniuteqaqataatinnissaat, siunertaavoq. Siunnersuisooqatigiit makkua suliassaraat:

- 1) Siunnersuisooqatigiit sullivinni avatangiisit pillugit apeqqutitut ilisimasaqarnermik siaruartereqaataassapput.
- 2) Siunnersuisooqatigiit nammineerlutik suliniuteqarlutik apeqqutit sullivinni avatangiisinut pingaaruteqartutut isigisatik oqallisigisassavaat, aammalu tamanna pillugu Naalakkersuisunut aamma Sullivinnik Nakkutilliisoqarfimmut oqaaseqaateqartassallutik.

3) Siunnersuisooqatigiit inatsisinik allanngortitsinissamut siunnersuutit aamma maleruagassat nutaat pillugit kiisalu suliaasat ataasiakkaat Naalakkersuisut imaluunniit Sullivinnik Nakkutilliisoqarfiup siunnersuisooqatigiinnut saqqummiussai pillugit oqaaseqaateqartassaaq siunnersuuteqartassallunilu.

Imm. 2. Siunnersuisooqatigiit suliaqarnermut ataatsimiititaliamik pilersitsisinnaapput aammalu taakkununga ilaasortassanik toqqaasinnaallutik, aamma siunnersuisooqatigiinni ilaasortat avataanniittunik.

Imm. 3. Siunnersuisooqatigiit suliaqarnerminut atugassamik sulianut paasisimasalinnit nalunaarutunik piniarsinnaapput aammalu misissuinernik aallartitsisinnaallutik.

Imm. 4. Naalakkersuisut siunnersuisooqatigiit suleriaasissaat akuerissavaat.

§ 65. Sullivinni avatangiisinut siunnersuisooqatigiit siulittaasoqarput suliffeqarnermi illuatungeriinnit oqaaseqaammik piniareernerup kingorna Naalakkersuisunit toqarneqartumik aammalu ilaasortat allat makkuupput:

- 1) ilaasortat 2-t Sulineramik Inuussutissarsiuteqartut Kattuffiannit (SIK) toqarneqartut.
- 2) Ilaasortaq 1 Nunatsinni Perorsaasut Kattuffiannit (N.P.K.), Peqqinnissaq pillugu Kattuffiit (PPK) aamma Kalaallit Nunaanni ilinniartitsisut kattuffiannit (IMAK) ataatsimoorullugu toqarneqartoq.
- 3) Ilaasortaq 1 Atorfillit Kattuffiannit (AK) aamma Ilinniagartuut Kattuffiannit (ASG) ataatsimoorullugu toqarneqartoq.
- 4) Ilaasortaq 1 Kalaallit Nunaanni Sulinermut Aqutsisut Kattuffiannit (SSK) toqarneqartoq.
- 5) Ilaasortaq 1 Kalaallit Nunaanni sulisitsisut kattuffiisa anginersaannit (ilaasortat amerlassusaat uuttuutigalugu) toqarneqartoq.
- 6) Ilaasortaq 1 Kalaallit Nunaanni kommuninit toqarneqartoq.
- 7) Ilaasortaq 1 Naalakkersuisunit toqarneqartoq.

Imm. 2. Aallartitanut ataasiakkaanut tamaginnut kattuffiit sinniisussamik toqqaassapput.

Imm. 3. Siulittaasoq aamma ilaasortat sinneri kiisalu taakkununga sinniisissat ukiut sisamakkaarlugit toqarneqartassapput aammalu toqqaqqinneqarsinnaallutik. Toqqaaneq piffissap ingerlanerani pisimappat, piffissap naamissaannaanut taanna atuutissaaq.

Imm. 4. Sullivinni avatangiisinut siunnersuisooqatigiinni aalajangiinerit ilaasortat najuuttut akornanni amerlanerussuteqarluni taasinikkut aalajangiiffigineqassapput. Taasinerit naligiinneranni siulittaasup taasineri aalajangiisuussaaq.

Imm. 5. Teknikkimut nakorsatullu suliamut paasisimasallit pisariaqartitsineq malillugu siunnersuisooqatigiinni taasisinnaatitaatinnagit peqataatinneqarsinnaapput.

Imm. 6. Sullivinnik Nakkutilliisoqarfik ataatsimik aallartitaqarluni, siunnersuisooqatigiit ataatsimiinneranni taasisinnaatitaanani peqataassaaq aammalu allatigut siunnersuisooqatigiinnut allattoqarfittut atuutissalluni.

§ 66. Naalakkersuisut sullivinni avatangiisinut tunngatillugu paasititsiniaanermut ilinniartitaanermullu tapiissuteqarsinnaapput.

Imm. 2. Naalackersuisut tapiissutit allaffissornikkut aqunneqarnerat pillugu maleruagassanik aalajangersaasinnaapput.

Kapitali 13

Sullivinnik Nakkutilliisoqarfik

§ 67. Naalackersuisut Kalaallit Nunaanni sullivinni avatangiisinut apeqqutitut tunngatillugu allaffissornikkut oqartussaasuni qullersaapput.

Imm. 2. Naalackersuisut ataanni aqutsisoqarfik taaguuteqartoq, Sullivinnik Nakkutilliisoqarfik, pilersinneqassaaq.

Imm. 3. Sullivinnik Nakkutilliisoqarfiup Kalaallit Nunaanni najukkani immikkoortortaqrarfiit amerlassusissaat aamma suliassat immikkoortortaqrarfiit akornanni agguagaanerat, aalajangersassavai.

§ 68. Sullivinnik Nakkutilliisoqarfiup Kalaallit Nunaanni sullivinni avatangiisit pillugit apeqqutini suliassarai:

- 1) suliffeqarfinnik, suliffeqarnermi kattuffinnik aamma tamanik sullivinni avatangiisinut apeqqutit pillugit ilitsersuineq,
- 2) Inatsisartut inatsisaat naapertorlugu maleruagassanik piareersaanermut Naalackersuisunut ikiuunnissaq,
- 3) Naalackersuisunit piginnaatinneqarneq naapertorlugu peqqussutinik aalajangersaaneq,
- 4) sullivinni avatangiisini isumannaallisaanermut peqqinnissamullu suliagarnerup pitsannorsarnissaa siunertaralugu teknikkikkut inooqatigiinnikkullu ineriartorneq pillugu malinnaanissaq,
- 5) suliagarnerit ingerlatinneqarnissaannut, sulliviit sumiiffiinut, teknikkikkut atortorissaarutinut il.il. kiisalu akuutissanut atortussanullu pilersaarutit suliarineqarneri aamma inatsit imaluunniit allaffissornikkut maleruagassat naapertorlugit akuersissummik tunniussineq aamma
- 6) Inatsisartut inatsisaat aamma peqqussutit Inatsisartut inatsisaanni inatsisitigut tunngavigalugu maleruagassinneqartut malinneqarnerisut nakkutiginninneq.
- 7) isumannaallisaanermut peqqinnissamullu piumasaqaatit aatsitassanut suliassaqrarfiup iluani piiaanissamut akuersissutini il.il. aalajangersarneqartut naammassineqarnerisut nakkutiginninneq.
- 8) sullivinni avatangiisit pillugit Inatsisartut inatsisaata atuuffissaasa iluanni, qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaata malinneqarneranik nakkutiginninneq.

§ 69. Piginnaatitaanerit Inatsisartut inatsisaanni Naalackersuisunut tunniunneqartut suliarinissaannut Naalackersuisut Sullivinnik Nakkutilliisoqarfiup pisortaa piginnaatissinnaavaat.

§ 70. Sullivinnik Nakkutilliisoqarfiup suliassai erseqqinnerusumik allanneqartumik annertussusilimmik pisortani oqartussaasumut allamut imaluunniit sullissivimmut namminersortumut inissinneqassasut, kiisalu Sullivinnik Nakkutilliisoqarfik qanoq annertutigisumik nakkutilliinermik taamaattumik nakkutiginnissanersoq, Naalakkersuisut aalajangersinnaavaat.

Imm. 2. Peqqussutit isumannaallisaanermut peqqinnissamullu tunngasut malinneqarsimasutut isiginissaannut, misileraanerit allatullu uppernarsaatit akuerineqartarnissaat pillugu maleruagassanik Naalakkersuisut aalajangersaasinnaapput.

Imm. 3. Akiliuteqartarneq pillugu maleruagassanik Naalakkersuisut aalajangersaasinnaapput, misissuinerit il.il. Sullivinnik Nakkutilliisoqarfimmit ingerlanneqartunut imaluunniit aallartinneqartunut akitsuutitut akigititatigut aalajangersagaasutut iluseqartuusinnaalluni.

§ 71. Naalakkersuisut akiliutit pillugit maleruagassanik aalajangersaasinnaapput, ilanngullugu Sullivinnik Nakkutilliisoqarfiup sullivinni avatangiisinut ilinniartitaanerup ingerlanneqarneranut aningaasartuutaannut ilaannakortumik matussutissatut, sulisitsisunit akiliutissanik akiliisitsisarneq pillugu.

Imm. 2. Akiliutit nalinginnaasumik ukiumi pineqartumi akinut aningaasarsianullu naleqqersuutit qaffaataannik ukiumoortumik iluarsineqartassapput.

§ 72. Pisinnaatitsissummik pigisaqartut allallu aatsitassat pillugit ingerlatallu tamatumunnga pingaarutillit pillugit Inatsisartut inatsisaat imaluunniit erngup nukingata innaallagissiornermut atorneqartarnera pillugu Inatsisartut inatsisaat malillugu akuersissummik peqartut, akiliummik akiliissasut pillugu maleruagassanik Naalakkersuisut aalajangersaasinnaapput. Akiliut Sullivinnik Nakkutilliisoqarfiup sumiiffiup akuersissuteqarfiusup iluani ingerlatanik oqartussaasutut suliarinnilluni nakkutilliineranut aningaasartuutitut matussutaassapput, taamaattoq takuuk imm. 3.

Imm. 2. Pisinnaatitsissummik pigisaqartup allallu imm. 1-imi pineqartunut ilaasut, Sullivinnik Nakkutilliisoqarfiup nakkutilliinermut atatillugu assartuussinermut, nutserisumut, nutserinermut kiisalu nerisaqarnermut unnuinermullu aningaasartuutaat, akilissavaat.

Imm. 3. Imm. 1 aamma 2 malillugit nakkutilliinermut akiliinissaq pillugu piumasaqaammi, piiaanissamut misissueqqaarnerit, ilisimatusarluni misissuinerit kiisalu pilersaarutip Naalakkersuisunit akuerineqartup tungaanut aatsitassarsiorluni misissuinerit ingerlataqarnerit, pineqartunut ilaanngillat.

Imm. 4. Naalakkersuisut imm. 2 malillugu akileeqqusisarneq pillugu maleruagassanik erseqqinnerusunik aalajangersaasinnaapput.

§ 73. Imartani aatsitassanut suliassaqarfiup iluani nakkutilliinermut aamma oqartussaasut suliarinninnerannut, suliffeqarfiit allallu Inatsisartut inatsisaanni matumani pineqartunut

ilaasut Inatsisartut inatsisaat malillugu suliaassanik suliarinninnermut allatullu oqartussaasut suliarinninneranut atatillugu aningaasartuutitut akiliissasut, pillugu aalajangersakkanik Naalackersuisut aalajangersaasinnaapput. Akiliutissaq akiliutitut imaluunniit aningaasartuutitut utertitsinertut akilersinneqarsinnaavoq.

Imm. 2. Akiliutit ilaalu ilanngullugit, Sullivinnik Nakkutilliisoqarfimmi aningaasartuutitut matussutissatut akilerneqartut, annertussusaat, aningaasartuutitut ilaannakortumik matussutissatut aalajangersarneqarsinnaapput.

§ 74. Sulitilluni ajutoornerit, toqunartumik nalaanneqarnerit, inuussutissarsiornermi nappaatit allanullu tunngasut sullivinni avatangiisinut pingaaruteqartut nalunaarutiginnissaannut pisussaaffeqarneq pillugu maleruagassanik Naalackersuisut aalajangersaasinnaapput.

Imm. 2. Pisortani sulitilluni imaluunniit suliaqartilluni pissutsinik Inatsisartut inatsisaannut matumunnga imaluunniit maleruagassanut Inatsisartut inatsisaat naapertorlugu aalajangersagaasunut unioqqutitsisunik ilisimasaqalersoq, tamanna pillugu Sullivinnik Nakkutilliisoqarfimmut nalunaarutiginnissaaq.

Imm. 3. Nakorsaq, inuk sullivimmini ajoqusiisumik sunnertissimasoq paasisaqaruni imaluunniit pasitsaasaqaruni Sullivinnik Nakkutilliisoqarfik nalunaarfigissavaa. Naalackersuisut tamanna pillugu maleruagassanik aalajangersaasinnaapput.

§ 75. Sullivinnik Nakkutilliisoqarfik tamanna pisariaqarsimappat sulitilluni ajoqusernerit kiisalu Arbejdsmarkedets Erhvervssikringip sulitilluni ajutoornerit aamma inuussutissarsiornermi nappaatit pillugit paasisutissanut tunngavissaannut nalunaarutiginninnissamut nalunaarutiginnittarfimmit paasisutissanik katersisinnaavoq ataatsimoortitsisinnaallunilu. Sullivinnik Nakkutilliisoqarfiup nakkutiginninnerata nakkutilliineratalu siunnerfilersorneqarnissaanut atugassatut suliffeqarfiit kinaassusersinissaannut suliarinninnissaaq aamma nakkutiginninnissaaq eqqarsaatigalugu nalunaarsukkanik ataatsimoortitsinissaaq siunertaralugu paasisutissat katersorneqassapput. Aammattaaq misissueqqissaarnissamik pitsaaliuinissamillu siunertaqartunut aamma kisitsisitigut naatsorsueqqissaarnissamik siunertaqartunut suliarinninnissaaq aamma nalunaarsukkanik ataatsimoortitsinissaaq siunertaralugu paasisutissat katersorneqassapput.

§ 76. Kinaluunniit Inatsisartut inatsisaat malillugu pisussaaffilerneqarsimasoq, piuaaffigineqarnermini Sullivinnik Nakkutilliisoqarfik paasisutissanik tamaginnik, nakkutilliilluni suliaqarnerup ingerlanneqarneranut pisariaqartunik, tunniussissaaq.

Imm. 2. Sullivinnik Nakkutilliisoqarfimmi sulisut eqqartuussivimmi aalajangiinertaqanngitsumik peqqissaartumik kinaassutsiminnut uppernarsaallutik, suliaqarnerminnik isumaginnissinnaanissamut tamanna pisariaqarsimappat, sukkulluunniit pisortat aamma namminersortut sulliviinut isersinnaatitaapput, taamaattoq takuuk imm. 3. Politiit pisariaqarpata tamatumunnga ikiuutissapput. Ikiuuttarneq pillugu maleruagassat erseqqinnerusut Naalackersuisunit aalajangersarneqarsinnaapput.

Imm. 3. Imm. 2 Sullivinnik Nakkutilliisoqarfiup sulinermik inuussutissarsiornermut tunngassuteqanngitsumik nakkutiginninnerani, inummit taassuma inigisaani, sunngiffimmi inigisaani, biiliini, sunngiffimmi angallataani imaluunniit pigisaani aalaakkaasuunngitsumi allami inoqutigiit pigisaanni ingerlanneqartumi, atuutissanngilaq. Taamaattoq Sullivinnik Nakkutilliisoqarfik elevatorinut allanullu kivitsinermit atortunut kiisalu naqitsinermik ingerlattakkanut atortunut eqqartuussivimmit aalajangiinertaqanngitsumik sulii nakkutiginnissinnaasoq, Naalakkersuisut aalajangersaasinnaapput.

Imm. 4. Sullivinnik Nakkutilliisoqarfimmi sulisut nakkutilliinermit ilaatillugu eqqartuussivimmi aalajangiinertaqanngitsumik, uppersaatit pissarsiarineqarsinnaapput tunniunneqassasut piumasaqarsinnaapput, ilanngullugu assiliisinnaallutik assigisaannillu iliuuseqarsinnaallutik, aammalu misissugassanik erseqqinnerusumik misissoqqissaarneqartussanik imaluunniit misissorneqartussanik tiguisinnaallutik. Sulisitsisoq imaluunniit tassunga sinniisuusoq tamanna pillugu ilisimatinneqassaaq, takukkit § 22 aamma § 23.

§ 77. Pissutsit Inatsisartut inatsisaannut imaluunniit Inatsisartut inatsisaat naapertorlugu maleruagassanut imaluunniit aalajangiinernut unioqqutitsisut, ingerlaannaq imaluunniit piffissamat killiliussap iluani iluarsineqassasut Sullivinnik Nakkutilliisoqarfiup peqqusissuteqarfigisinnaavaa.

Imm. 2. Sulisut imaluunniit allat isumannaatsuunissaannut imaluunniit peqqissusaannut navianartorsiorneq nalliulluinnalersoq, annertoq pinngitsoortinniarlugu pisariaqartoq Sullivinnik Nakkutilliisoqarfik naliliiguni, navianartorsiorneq ingerlaannaq pitsaaliorneqassasoq peqqusisinnaavoq, ilanngullugit:

- 1) najuuttut ingerlaannaq navianartorsiorfiusumit qimagutissasut,
- 2) maskiinamik, maskiinap atortuanik, pooq, sanaartugassamik ikkussoriaannarmik, atortorissaarummik, sakkumik, allatut teknikkikkut atortorissaarummik imaluunniit akuutissamik imaluunniit atortussamik atuneq unitsinneqassasoq, imaluunniit
- 3) suliaqarneq tamarmi unitsinneqassasoq.

Imm. 3. Teknikkikkut atortorissaarummik, inuit illersuutissaattut atortumit imaluunniit akuutissaq imaluunniit atortussamik, tassunga aalajangersakkanut naapertuuttumik atorneralarualuni, isumannaallisaanermut imaluunniit peqqinnissamat navianartorsior-titsisoq paasinarsisimasumik pilersuisoq imaluunniit nittarsaassisoq, tamatuminnga pitsaaliuinissamat pisariaqartunik iliuuseqassasoq, Sullivinnik Nakkutilliisoqarfimmi pisortaq peqqusisinnaavoq. Ilanngullugu peqqusissutigineqarsinnaapput,

- 1) pilersuineq imaluunniit nittarsaassineq unitsinneqassasoq, aamma
- 2) teknikkikkut atortorissaarut pineqartoq, inunnet illersuutitut atortussaq imaluunniit akuutissaq imaluunniit atortussaq niuerfimmit utertinneqassasoq.

§ 78. Sullivimmi nakkutilliinermit allattuiffimmik imaluunniit taamaaqataanik nakkutilliisut takusaanerannut, peqqusissuteqarnerannut allanillu sullivinni avatangisunut

tunngasunik nalunaaruteqarnernut uppersaammik peqassasoq aammalu nakkutilliinermut allattuiffiup imaluunniit uppersaatit atornerqarnissaat toqqorsimatinneqarnissaallu pillugit maleruagassanik Naalackersuisut aalajangersaasinnaapput.

Imm. 2. Sulisitsisup Sullivinnik Nakkutilliisoqarfiup piffissamut killissaliussaatur aalajangigaata iluani allaganngorlugu peqqussisuteqarnermut il.il. tunngatillugu utertitsinissaq pillugu piumasaqaatit malissavai.

§ 79. Oqartussaasut aamma inuit kapitalit 10, 12 aamma 13 malillugit suliassanik suliarinnittut, kiisalu kinaluunniit allatigut tamatumunnga ikiuuttoq, Kalaallit Nunaanni pinerluttulerinermut inatsimmi § 50 malillugu nipangiussimasussaataapput.

Imm. 2. Nakkutilliilluni takusaaneq naammagittaalliuuteqarnerup malitsigisaanik ingerlanneqartoq, Sullivinnik Nakkutilliisoqarfimmi sulisoq sulisitsisumut imaluunniit taassuma sinniisaanut paasissutisseeqqusaanngilaq.

§ 80. Sullivinnik Nakkutilliisoqarfiup pisortani oqartussaasunik allanik suleqateqarnera pillugu maleruagassanik atugassarititaasussanillu Naalackersuisut aalajangersaassapput.

Imm. 2. Sullivinnik Nakkutilliisoqarfik nakkutilliinissaq pillugu peqqissutsimut oqartussaasunut suleqatigiinnissamut isumaqatigiissuteqarsinnaavoq.

Kapitali 14

Sullivinni avatangiisit pillugit naammagittaalliortarfik

§ 81. Sullivinnik Nakkutilliisoqarfiup aalajangiineranut naammagittaalliuuteqarnek, aalajangiinerup pineqartumut nalunaarutigineqareernerata kingorna sapaatit akunneri 6-it qaangiutsinnagit Sullivinni avatangiisit pillugit naammagittaalliortarfimmut suliakkiissutigineqarsinnaavoq. Sullivinnik Nakkutilliisoqarfiup aalajangiineri allaffissornikkut oqartussamut allamut imaluunniit Naalackersuisunut naammagittaalliuutigineqarsinnaanngillat.

Imm. 2. Naammagittaalliornek Sullivinnik Nakkutilliisoqarfimmut nassiunneqassaaq. Sullivinnik Nakkutilliisoqarfiup aalajangiineri attatiinnarpagu, naammagittaalliuutaasoq Sullivinni avatangiisit pillugit naammagittaalliortarfimmut ingerlateqqinneqassaaq.

Imm. 3. Sullivinni avatangiisit pillugit naammagittaalliortarfiup Sullivinni Nakkutilliisoqarfiup aalajangiineri allannortissinnaanngilai. Sullivinni avatangiisit pillugit naammagittaalliortarfik isumaqarpat Sullivinni Nakkutilliisoqarfiup aalajangiinerani kukkusoqarsimasoq, imaluunniit Sullivinni avatangiisit pillugit naammagittaalliortarfik isumaqarpat Sullivinni Nakkutilliisoqarfiup aalajangeereernerata kingorna suliame paasissutissanik nutaanik, nutaamik suliarinninnissamut tunngavilersuutaasinnaasunik, saqqummertoqarsimasoq, suliaq Sullivinni Nakkutilliisoqarfimmi nutaamik suliarineqartussanngorlugu utertinneqassaaq.

Imm. 4. Naammagittaalliornek piffissaq eqqorlugu tunniunneqartoq, Sullivinni avatangiisit

pillugit naammagittaalliortarfiup aalajangiinissaata imaluunniit Sullivinni avatangiisit pillugit naammagittaalliortarfiup allatut aalajangernissaata tungaanut, kinguartitsinermik sunniuteqassaaq. § 77, imm. 1 malillugu pissutsit pillugit aalajangiinernut naammagittaalliuutaasut, ingerlaannaq iluarsineqartussat, kiisalu § 77, imm. 2 aamma 3 malillugit aalajangiinerit, kinguartitsinermik sunniuteqassanngillat.

Imm. 5. Pissutsit immikkut ittut tamanna pisussaatippassuk, naammagittaalliuutaasooq piffissaq eqqorlugu saqqummersimanngikkaluartoq, Sullivinni avatangiisit pillugit naammagittaalliortarfiup naammagittaalliuut suliarisinnaavaa aammalu taanna kinguartitsinermik sunniuteqartissinnaallugu.

Imm. 6. Sullivinni avatangiisit pillugit naammagittaalliortarfik naammagittaalliummi aalajangiitinnagu, Sullivinni avatangiisinut siunnersuisooqatigiinnit oqaaseqaammik piniartoqarsinnaavoq.

Imm. 7. Sullivinni avatangiisit pillugit naammagittaalliortarfiup naammagittaalliuutaasumi aalajangiinnginnerani, inunnit suliamut immikkut ilisimasalinnit oqaaseqaammik piniartoqarsinnaavoq.

§ 82. Sullivinni avatangiisit pillugit naammagittaalliortarfik siulittaasoqarpoq aamma 2-nik ilaasortaqarluni, imatut toqqagaasunik:

1) ilaasortat 2-t Sullivinni avatangiisinut siunnersuisooqatigiinnit toqqarneqartut.
2) ilaasortaq 1 tassaasusaaq Atuisartoqarnermut Unammilleqatigiinnermullu Aqutsisoqarfimmi Aqutsisoqarfimmut pisortaq imaluunniit sinniisusaaq taassuma toqqagaa. Atuisartoqarnermut Unammilleqatigiinnermullu Aqutsisoqarfimmi ilaasortaq Sullivinni avatangiisit pillugit naammagittaalliortarfimmi siulittaasuussaaq.

Imm. 2. Ilaasortat ukiunut sisamanut toqqarneqassapput.

Imm. 3. Sullivinni avatangiisit pillugit naammagittaalliortarfiup suliasani ataasiakkaani aalajangiineri, ataatsimiinnermi imaluunniit allaganngorlugu taasinikkut ilaasortanut aalajangiiffigineqartussanngorlugit saqqummiussinerup nassiunneqarneratigut, aalajangiiffigineqassapput.

Imm. 4. Sullivinni avatangiisit pillugit naammagittaalliortarfik minnerpaamik ukiumut ataasiarluni naapeqatigiilluni ataatsimiisaaq.

Imm. 5. Sullivinni avatangiisit pillugit naammagittaalliortarfiup suleriaasia Naalakkersuisunit aalajangersarneqassaaq.

Imm. 6. Sullivinni avatangiisit pillugit naammagittaalliortarfiup allattoqarfia Atuisartoqarnermut Unammilleqatigiinnermullu Aqutsisoqarfimmit isumagineqassaaq.

Kapitali 15

Pinerluuteqarsimasunut inatsisit malillugit pineqaatissiisarneq

- § 83.** Kalaallit Nunaanni pinerluttulerinermut inatsit malillugu pineqaatissinneqassaaq
- 1) § 12, § 13, imm. 1-3-mik, § 14-imik, § 15, imm. 1-imik aamma 2-mik, §§ 17-20-mik, §§ 24-34-mik, § 37, imm. 1-imik aamma 2-mik, § 38, imm. 1-imik, § 40, imm. 1-imik, § 42, imm. 1-imik, § 44, imm. 1-imik, § 63-imik, § 74, imm. 2-mik aamma 3-mik, § 76, imm. 1-imik, aamma § 78, imm. 2-mik, unioqutitsisoq
 - 2) kapitali 8-mut aamma 9-mut akerliusumik suliaqartitsisoq, suliaqarnermik taamaattumik aqutsisoq imaluunniit nakkutilliisoq imaluunniit kapitali 8-mut akerliusumik suliaqartoq,
 - 3) § 77 malillugu peqqusissuteqarnermik malinninngitsoq imaluunniit
 - 4) § 21, imm. 2 malillugu paasissutissanik tunniussinngitsoq.

Imm. 2. Imm. 1 malillugu pinerluttulerinermut inatsisitigut pineqaatissiisummik nalilersuinermi, unioqutitsineq inuit ilungersunartumik ajoquserlutik imaluunniit toqumik kinguneqarluni ajutoornermik malitseqarsimasoq, pisutut immikkut sakkortunerusutut isigineqassaaq.

Imm. 3. Imm. 1, nr. 1 malillugu pinerluttulerinermut inatsisitigut pineqaatissiisummik nalilersuinermi, sulisitsisoq Inatsisartut inatsisaanni kapitali 3 malillugu pisussaaffimminik naammassinnissimappat, pisutut annertuutut isigineqassaaq, sulisut piaaralutik imaluunniit mianersuaalliorujussuarlutik Inatsisartut inatsisaanni piunasaqaatit makkua unioqutissimagaat:

- 1) inuit illersuutitut atortussaannik atuinissaq,
- 2) silaannarissanernut iliuusissanik atuinissaq,
- 3) illersuinermut atortunik imaluunniit isumannaallisaanermut iliuusissanik atuinissaq imaluunniit
- 4) sulinermi periaatsinik isumannaatsunik atuinissaq.

Imm. 4. Pisut imm. 3-mi taaneqartut saniatigut imm. 1 aamma 2 malillugit pinerluttulerinermut inatsisitigut pineqaatissiisummik nalilersuinermi, pisutut annertuutut isigineqassapput:

- 1) unioqutitsineq piaaraluni imaluunniit mianersuaalliorujussuarluni pisimasoq,
- 2) unioqutitsinermi inuunermut imaluunniit peqqissutsimut ajoqusiisoqarsimasoq imaluunniit tamatuminnga navianartorsiortitsisoqarsimasoq, pisoq imm. 2-mi pineqartunut ilaanani,
- 3) siusinnerusukku § 77, imm. 1 imaluunniit 2 malillugit pisunut taakkununga imaluunniit taamaaqataannut peqqusissuteqartoqarsimasoq, imaluunniit
- 4) unioqutitsinermi pineqartup nammineerluni imaluunniit allat aningaasaqarnikkut iluaquserneqarnissaat anguneqarsimasoq imaluunniit anguneqarnissaa siunertaasimasoq.

Imm. 5. Inuusuttunut 18-it inorlugit ukiulinnut inuunermi imaluunniit peqqissutsimi ajoqusiisoqarsimasoq imaluunniit tamatumunnga navianartorsiortitsisoqarsimasoq, pisutut immikkut sukannersutut isigineqassaaq, takuuk imm. 4, nr. 2.

Imm. 6. Iluanaarutit unioqutitsinermi pissarsiarineqarsimasut arsaarinnissutigineqanngippata, akileequsissutissamik nalilersuinermi, ilanngullugu

tapiliussamik akileeqqusissuteqarneq, aningaasaqarnikkut iluaqutissarsiarineqartup imaluunniit siunertarineqartup annertussusaa immikkut isiginiarneqassaaq.

Imm. 7. Kalaallit Nunaannut pinerluttulerinermut inatsimmi § 13 peqataanermut tunngasoq, imm. 1-imi aamma 2-mi pinerluttulerinermut inatsisitigut akisussaaffeqarnermi pineqartumi, atorineqassaaq.

Imm. 8. Pinerluttulerinermut inatsisitigut akisussaaffeqarnerup uparuarneqarnissaanut killissaliussaq, §§ 29-34-mik aammalu maleruagassanik § 35 naapertorlugu aalajangersarneqartunik unioqquitsinermi, ukiunik tallimanik sivisussuseqarpoq.

§ 84. § 12-ip, § 13, imm. 1-3-p, § 14-ip, § 38, imm. 1-ip, § 40, imm. 1-ip, § 42, imm. 1-ip, aamma § 44, imm. 1-ip, kiisalu pissutsit § 83, imm. 1-imi, nr. 2-mi aamma 3-mi pineqartunut ilaasut unioqqutinneqarneranni, unioqquitsinermi sulisitsisoq piaaraluni imaluunniit mianersuaalliorluni unioqquitsinerarneqarsinnaanngikkaluartoq, sulisitsisoq akileeqqusissummut akisussaatinneqarsinnaavoq, taamaattoq takuuk imm. 3. Akileeqqusissummut akisussaasuunissamut piumasaqaataavoq, unioqquitsineq inunnut suliffeqarfimmut attuumassuteqartunut ataatsimut arlalinnulluunniit imaluunniit suliffeqarfimmut tutsinneqarsinnaasoq. Aalajangersagaq manna malillugu akileeqqusissummut akisussaasuunermut Kalaallit Nunaannut pinerluttulerinermut inatsimmi § 128, imm. 4 atuutinngilaq.

Imm. 2. Akileeqqusissutip nalilersorneqarnerani § 83, imm. 2, 4 aamma 5, taamaaqataanik atuutissapput.

Imm. 3. Sulisitsisup Inatsisartut inatsisaanni kapitali 3 malillugu sulisitsisup pisussaaffini naammassisimappagit, sulisitsisoq pinerluttulerinermut inatsimmi pineqaatissiissummik pineqaatissinneqarsinnaanngilaq, sulisut Inatsisartut inatsisaanni piumasaqaatit makkua unioqquittissimappasigit:

- 1) inuit illersuutitut atortunik atuinissaq,
- 2) silaannarissanermut iliuusissanik atuinissaq,
- 3) illersuutitut atortunik imaluunniit isumannaallisaanermut iliuusissanik atuinissaq imaluunniit
- 4) sulinermi periaatsinik isumannaatsunik atuinissaq.

§ 85. Peqqussutini Inatsisartut inatsisaat naapertorlugu aalajangersarneqartuni, peqqussutininik aamma peqqusissutininik imaluunniit peqqussutit naapertorlugit inerteqquteqarnernik unioqquitsinermut Kalaallit Nunaannut pinerluttulerinermut inatsit malillugu pineqaatissiissutissat pillugit aalajangersakkat aalajangersarneqarsinnaapput. Aammattaaq aalajangersarneqarsinnaavoq, sulisitsisut peqqussutininik, peqqusissutininik imaluunniit inerteqqutininik unioqquitsinermut akisussaasuusoq, naak unioqquitsineq piaaraluni pisutut imaluunniit mianersuaalliornerlut pineqartumut tutsinneqarsinnaagaluartoq. Unioqquitsineq inunnut suliffeqarfimmut attuumassuteqartunut ataatsimut arlalinnulluunniit imaluunniit suliffeqarfimmut tutsinneqarsinnaassasoq, akileeqqusissuteqarnermut

akisussaaffiliinissamut piumasaqaataavoq. Akileeqqusissummut akisussaasuunermet taamaattumut Kalaallit Nunaannut pinerluttulerinermut inatsimmi § 128, imm. 4 atuutinnngilaq.

§ 86. Kalaallit Nunaannut pinerluttulerinermut inatsit malillugu pineqaatissiissutinik § 84, imm. 1, oqaaseqatigiit siulliit, aamma § 85, oqaaseqatigiit aappaat malillugit suliffeqarfimmi pisortat allallu pisussaaffilerneqarsinnaanngillat, takuuk § 22.

§ 87. Pinerluttulerinermut inatsimmi kapitalit 5-ianni maleruagassat malillugit inuit inatsisit malillugit pinerluttulerinermut inatsisitigut akissussaaffilerneqarsinnaapput. § 84, imm. 3, taamaaqataanik atuuppoq.

§ 88. Inuusuttut 18-it inorlugit ukiullit Inatsisartut inatsisaanni matumani aalajangersakkanut imaluunniit Inatsisartut inatsisaat naapertorlugu peqqussutit aalajangersarneqartut unioqqutillugit sulisinneqarpata, sulineq ilisimasimappassuk, angajoqqaatut oqartussaasoq akileeqqusissummik pineqaatissinneqarsinnaavoq.

§ 89. Akileeqqusissutit inatsit manna imaluunniit peqqussutit inatsit manna malillugu aalajangersagaasut, malillugit pineqaatissiissutigineqartut, nunap karsianut tutsinneqassapput.

Imm. 2. Eqqartuussivimmi aalajangiinerni, taanna malillugu Inatsisartut inatsisaat manna malillugu pisussaaffimmik naammassinnittussaatisoqarluni, pinngitsaaliinissamut sakkussatut tulleriissaartumik akileeqqusissuteqarneq aalajangersarneqarsinnaavoq, nunap karsianut tutsinneqartussa.

§ 90. Eqqartuussivimmi suliat Kalaallit Nunaanni Eqqartuussivimmi siullertut suliarinnittussani suliarineqassapput.

Kapitali 16

Atuutilerfia

§ 91. Inatsisartut inatsisaat ulloq 1. juli 2018 atuutilerpoq.

Imm. 2. Peqatigisaanik aatsitassat pillugit ingerlatallu tamatumunnga pingaarutillit pillugit inatsisartut inatsisaat nr. 7, 7. december 2009-meersumi (aatsitassanut ikummatissanullu inatsit), kingusinnerusukkat allannguuteqartinneqartumi, § 79 atorunnaarsinneqarpoq.

Imm. 3. Peqatigisaanik qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaanni nr. 33-mi, 9. december 2015-imeersumi § 1, imm. 4 atorunnaarsinneqarpoq.

Imm. 4. Sullivinni avatangiisit pillugit aalajangersakkat ullup atuutsitsilerfissat tungaanut atuuttut, ilanngullugit nalunaarutit kiisalu ilitsersuutit aamma teknikkimut peqqussutit, aalajangersakkat ilaalu ilanngullugit atorunnaarsinneqarnissaasa imaluunniit

aalajangersakkanik nutaanik taarserneqarnissaasa tungaanut, Inatsisartut inatsisaata matuma malitsigisaanik, ingerlatsivimmi oqartussaasoq pillugu allannguutit atuutsillugit, atuutiinnassapput.

Namminersorlutik Oqartussat, ulloq xx.xx.2017

Kim Kielsen